

Ibulu Ibulu am ekņengat zapat meluwaņ kumindadaņ.

Zapat meluwaņ kapi kwiyaņ penaņ kuye ke sosok ku zemsokbembenaņ. Pâlaņ zapat meluwaņ kukuņaņ sambe ikņaņgat kwitnaņ kumti, “Neņ kuya,” e ņep manzemkawaņbein. Âpme Ibulu kapiyet zet esemtaņ keboņ ņen ku tazin. Kogogapmti an nânânjin temaņ Kawawaņgalen zetgat nânâ mulup mamiwan kwiyaņ kup keyet zet mulup ikņakņen mamip. Ekņen nâmkiņpepeņinmak kukuņaņgat mambien ekņenaņ Pâlaņ kup zewien. Yaņgut Lutayaņ maņgeengatnaņ takwalip ekņenaņ kwiyaņ kup keyet zemusulalak zet omba mamip. Pâlaņ ku kup zewien e yaņaņ kapigogapmti zet ke zenenaņ. Egalen zapat meluwaņaen ekbegen egaņ kuye set katnaņ kwep mâti kukuņaņ nembon yekgapmti zenenaņ. Zapat meluwaņ kapi kwitnaņ Ibulu kukuņaņ eneyet Zuda am ekņengalen zelin Ibulu.

Ibulu an ma imbi kwiyaņ zapat meluwaņ kapi kuyeyaņ am nâmkiņpepeņinmak ekņen sindem omba penaņ nâmkiņpepeņinaņgapmti tatimeyepm zemgwatnaņ zet ma nâmkiņpepeņin katikņaņ beme tatatgat nâmti zet kapi kuye. Zuda am ekņenaņ Kawawaņgat sesewatpesâti sâpe sâpe sepem ikņak ikņak mambumkwetemien kemak Zisasiyaņ an sâpe sâpe bumbu mulup mti sekņaņ sâpe buye keyaņ mobotnaņ bein

zemti zapat meluwanj kapi kuye. Sâpe sâpe bumbu mulup mkwakwatnanj keyet penañ ilak Zisasmagen sokbeye keyepmti tâtâ alaknanj ekmagen mimiñan ke ku elenğenğeyelen nâmti zapat meluwanj kapi kuye.

Zet ƚoteknanj teman kapigoganj Ibulu zapat meluwanj kenan talip:

1:1-5 Kawawanj alak pi set iknjak ƚen aikzin Nemunanj Zisasiyanj set ke bein

1:6-7:28 Kilaisiyanj tâtâ itnananğalen mulup an sebemindein

8-10 Ningalen sâpe sâpe bumbu an Zisas eganj sâpe sâpe buye keyanj sâpe sâpe bumkwakwatnanj ke sebemindein

11-12 Nâmkinjpepeen ewe gwanj gwanj kumtatalen indakumtetitiñanj delanj zenzenanj

13 Zet zemdelañ zenze zet

Zisasiyanj golan zenze an itnananj mamkwabi-enmak ensel ekjen sebemindein

¹⁻² Kawawanj eganj golanj zenze an zemindeme ekjenanj yeñsokjine iknanğat mundumann kan sepemanj iknjak iknjak ma zet setnanj yananj iknjak iknjak mandiindom kwatnepemelak alak tatnuwen kapiyetnanj Zisasiyanj kosâpmnen kan keyet Kawawanjanj iknanğat yananj mkawanjbeme delanj zenzenanj iknanğat Nemunanj penañ zem-peme toti zet tadiindoin. Kawawanjanj Nemunanj keyanj kwitnanj kwitnanj sambe keyet toñanj bemti mamayet ombempeye. Eneyet ege-lanj ilisakwep mamti kwitnanj kwitnanj sambe ke mbun. ³ Kasupgat sanğa soñğanjanj mamekozin

sepem kegogak Kawawaŋgat yaŋaŋ penaŋ Nemunaŋaŋ mamsokbemkawaŋbein. Nemunaŋ ek yaŋaŋ iŋŋak yek; egegat yaŋit kwep. Zet dem-busekŋaŋ windaŋaŋmak zeme keyaŋ kwitnaŋ kwitnaŋ sambe kapi bandim mpeme matazin. Egaŋ ningalen bekaŋaŋ zulutndemti gwaen mogeyaŋ Amobotnaŋ Temaŋ egat betnaŋ penaset mundum windaŋaŋbeŋ keyet totazin.

Kawawaŋgat Nemunaŋ ensel ekŋen aŋgosomindemti mobotnaŋ tazin

⁴ Âpme Zisasiyaŋ ensel ekŋen sebemindemti motazin. Kogok mti ensel ekŋengalen kwit zet buŋam timtotindemti egaŋ kwizet buŋam temaŋ timti matazin. ⁵ Kawawaŋaŋ Nemunaŋgat nâmti zet kapigok zeye,

“Geŋ nâgât Nemun penaŋ; nit alak Bip Nemun belup.” *(Sam 2:7)*

Ma ŋen kapigok zeye,

“Neŋ gâgât Bipdi bemti mambap ma geŋ nâgât Nemun bemti mambanik.” *(2 Samuel 7:12-14)*

Ensel ekŋengat Kawawaŋaŋ zet kegok ŋen ku zeye. ⁶ Yaŋgut egaŋ Nemunaŋ kwewetaŋ ke msalen ewe peme tobe kan keyet zet pigok zeye,

“Kawawaŋgalen ensel ekŋenaŋ ek pedondom samti sesewatpewep.” *(Sam 96:7-9)*

⁷ Kawawaŋaŋ enselŋene ekŋengat kapigok zeye, “Tâgâmak taŋamaŋ nâlen zet nâmti zetn mamâlupnok ensel ekŋen nâlen mulup angapmti zetn maŋgawepup.” *(Sam 104:4)*

⁸ Kawawaŋaŋ Nemunaŋgat gulak kapigok zeye,

“Kawawaŋ, geŋ Amobotnaŋ mundumdi katikpepepiŋ tatat kaliŋaŋ tapmeti mambanik. Ma Amobotnaŋ mamandi teŋ keyaŋ amobotnaŋgalen tonŋe ke nembon beme am indamusuwewet dolakŋaŋ penaŋ mbanik. ⁹ Geŋ mama mimi teŋ keyet tikŋaŋ manânik ma mama mimi bekaŋaŋ keyet kasa mamnik. Kogogapmti neŋ gâgât nâmtikŋaŋ mti geŋ Amobotnaŋ tatagat ombemgemti kelakŋaŋ zulutgeap keyet nâmti oloŋen palen mambanik. Ke ensel ekŋen sebemindemti Amobotnaŋ tatagat ombemgemti kelakŋaŋ zulutgeap.”
(Sam 45:6-7)

¹⁰ Kawawaŋaŋ ŋen ewe kapigok zeye,

“Amobotnaŋ, geŋ yaŋbembenan msat palen kwitnaŋ kwitnaŋ mbanan ma kululuŋgalen kwitnaŋ kwitnaŋ betdaŋ munduminan bemandemebenanaŋ tapmelip. ¹¹ Seŋgum melakandu keboŋ teŋgenan mambeinok msat ma kululuŋ teŋgenan bemti asekbalup. Geŋgulak mama kanzizit mamambanik. ¹² Kegok beme geŋ amnaŋ saŋgum taŋganaŋ mamunŋunpeme mewen kegok geŋ kululuŋ ma msat munŋuŋ timane mowembe. Geŋgulak sepem mambanan kegogak ewe mambanik. Ma an penaŋ bambepiŋ mamti mamambanik.” *(Sam 102:25-27)*

¹³⁻¹⁴ Ensel ekŋen tâgâ etaŋ mme ekŋenaŋ Kawawaŋgalen mulup etaŋ mamip. Kawawaŋaŋ ekŋen zemindeme meti am ekŋen ikŋaŋ gilik zemindatitiyet manâin ekŋen ke

maindamukulem mamimindeip. Kegok
mammnanjut Kawawaŋaŋ ensel ŋengat kapigok
ku dunduye,

“Kot betn penaset tapmane neŋ kasandine ekŋen
kandaŋdanen mulaloŋ indema selanŋ in-
dim kapisik indemane topmâpme tabanik.”
(*Sam 110:1*)

2

Kawawaŋaŋ Nemunaŋgat zet zein ke ku bankumpewep

¹ Nin weyaŋti zet eweŋan tiwen ke
bankumpewanupmagengat ewe tim kitik
mtabanup. Mneti Nemunaŋgat zet zeye ke
pemann wembemagengat nâpeŋ mamambanup.

² Eweŋan Kawawaŋaŋ zet notnaŋ ensel ekŋen
zemindeme Mosesiyet kot zeme egaŋ mtoge
ke diindome am ekŋenaŋ aŋgosowien ma ke
kulume keyet dopmaŋ Kawawaŋaŋ sakwep
mamutumindantan.

³⁻⁴ Amobotnaŋaŋ nin
aŋgalaŋ ndendeyet zetnaŋ ikŋaŋ zemkawaŋaŋ
beye. Âpme am sokŋan tati wakŋin penaŋaŋ
nâmbien ekŋenaŋ zet ke zemkotnepeme kalinaŋ
bempti tazin. Naman Kawawaŋaŋ ikŋaŋ muluwaŋ
mamanamaŋ notnaŋ mge ma menok notnaŋ
mti winderŋaŋ sakam ikŋak ikŋak keyet yaŋaŋ
zemkawaŋbempti zetnaŋ ke mgwatnaŋ mge.
Egaŋ kegowak Emetak Tenŋalen taolet dolakŋaŋ
nin kwep kwep ikŋaŋgat keŋaŋgalak ndaye.
Keyepmti Nemunaŋgalen zet zapatnaŋ weyaŋti
ku timtabanup beme dopmaŋ penaŋ sukwep
mobotnaŋ mutumndawe.

Kawawaŋaŋ Zisas kwit zapaŋnaŋ temaŋ saye

⁵ Msat alakŋaŋ sokbewe keyet zetnaŋ manzenup ke Kawawaŋaŋ ensel ekŋenaŋ damuŋ mimiyet ku zeye. ⁶ Kawawaŋgalen Zet Itnaŋan an ŋenaŋ zet pigok zeye,

“Am nin pembedaŋ yegaŋgut Geŋ ningat nâpeŋ mamanan. Ma am nin Adamaŋat nembanaŋe nin tototnaŋ yaŋgut Geŋ ningat damuŋ dolakŋaŋ matatnik. ⁷ Geŋ kan belaknik bugan ensel ekŋengat kandaŋinan mamayet zemndewanan. Yaŋ Geŋ nin busatnaŋ ma kwizet buŋam temaŋmak miakndewanan. ⁸ Mti kwitnaŋ kwitnaŋ sambe ningat setn kandaŋan baen mulaloŋ pewanan.” *(Sam 8:4-6)*

Kawawaŋaŋ kwitnaŋ kwitnaŋ sambe ningat kandaŋnan mulaloŋpeye. Kwitnaŋ kwitnaŋ kalelaŋpiŋ belak sembe melesiŋ nin damuŋ mimiyet ndaye. Kan pigogat kwitnaŋ kwitnaŋ ningat kandaŋnan maŋge bempenaŋ keyet ku tapme maeknup. ⁹ Yaŋgut nin Zisas egat yaŋaŋaŋ nânup. Eweŋan kan belaknik bugan ensel ekŋengat tototnaŋin maŋge ke Egaŋ Kawawaŋgalen keŋ taolet ke msokbembeyet ma am sambe indamukulem mti gakikiyet kegok maŋge. Egaŋ sek sindem temaŋ timti gakiye keyepmti Kawawaŋaŋ mwa-tonzempemti elimiak senge songaŋaŋmak ma kwizet buŋamaŋ temaŋ ke saye.

¹⁰ Kawawaŋaŋ kululuŋ ma msat ma kwitnaŋ kwitnaŋ sambe mge keyaŋ ikŋaŋgat kwizet buŋam mmobogat nâmti mge. Ma amnaŋ kululuŋen mebegalen nâmti Nemuŋaŋ zempeme toti

sek sindem tiye keyañ amnañ mama kanzizit aiikgalen setnañ beye. Kegok ke Kawawañañ amnañ nâmkijpepeyeen kwakwagat nâmti Zisasiyet nâmpeme ekñengat Anjalalañ Anñin beye.

¹¹ Âpme am Zisasiyañ mme teñ beip ekñen ke ma Zisas ikñañmak ekñen mme teñ bembenañ temakwep Biwin kwewetañ ke Kawawañ keyepmti Zisasiyañ, “Ip meniñne,” zenzeyet nâme nukñañ ku mambein. ¹² Zet keyet zet ñen kapigok zenzenañ tazin,

“Neñ buñam zapadi ip meniñne ekñenmagen zempalakñañ bewap. Neñ ip meniñne ekñengat tunjuwinan zemsesewatgewap.”
(*Sam 22:22*)

¹³ Ma zet ñen ewe pigok zeye,

“Neñ Kawawañgat nâmkijpempti penañ mambap.”
(*Aizaya 8:17*)

Naman ñen pigok zenzenañ,

“Pi neñ ma Kawawañañ ip meniñne namâge ekñenmak neñ nsakwep tatnup.” (*Aizaya 8:18*)

Zisas ek an penañ manje keyepmti egañ nin ñep ndamukulem mimndewe

¹⁴ Âpme ip meniñane ekñen sek sesubañinmak mamaip kegogak egañ ekñengat sepem timti indamukulem msâti sokbeye. Mme an penañ mame kume gakimti wage keyañ gakiki toñañ Sadañ egalen windenañ mtopeye. ¹⁵ Mti gakikiyet kiñgagat keyañ indatimti tapme kan katan egalen

mka katikɲan mamaip ekɲen indamenzemti-tiyet kekok mge. ¹⁶ Egaɲ mulup mge ke en-sel ekɲengat mti ku mge. Egaɲ Abalaamgalen iɲsokɲane ndamukulem mimndesâti kekok mge. ¹⁷ Keyepmti Ek ip meniɲane ekɲenmak sepemin kwewetaɲ penanɲ bembeyet zempepenanɲ. Egaɲ kekok mti ɲep sâpe sâpe bumbu an ɲenɲan mamti Kawawaɲgalen mulup mbe. Ek an aɲgalan gogot toɲan ma an mulup esemtenɲ penanɲ mamin ma egaɲ ɲep am sambeyelen yomin maasekmâzin. ¹⁸ Egaɲ sek sindem nâmti tetimaemaen mege keyepmti am nin tetimaemae sokbemndame ɲep ndamukulem mimndewe.

3

Zisasiyan Moses aɲgosompemti mobotnanɲ beyeyanɲ matazin

¹ Kilaismagen notnne, Kawawaɲ kululuɲen mamainnanɲ Zisasiyelen mulupgapm indamandame kobien. Nin Zisasiyet kapigok nâmâtâti manzemkawaɲbenup. Ek sâpe sâpe bumbu an ɲenɲan ma Kawawaɲanɲ ombempemti buɲam zapatnanɲ zemkawaɲbembeyet peme koge. Zisasiyet mulupmanɲ ɲen kekok ke mamingat nâpenɲ mamambep. ² Mosesiyan Kawawaɲgalen mulup nâmsemtenɲ mkwage sepem kekokgak Zisasiyan Kawawaɲanɲ mulup mimiyet zempeye ke kokogak nâmsemtenɲ mge. ³⁻⁴ Nin an ɲenɲan mka dolakɲanɲ mawalazin beme an mka walage keyet kwizet buɲamanɲ mamwatnup. Sepem kekokgak Mosesiyet an dolakɲanɲ zenup yanɲut

Zisasiyan kwitnan kwitnan sambe mme sok-beyeyepm egat kwizet bujanan mwawagalen. ⁵ Moses egan Kawawanğalen mulup an mamti zet gawepupu mulup mti mamkwage. Keeset bam sokbewe keyet bujam zapatnan zenzeyelen keyet sisiliñ annan mamkwage. ⁶ Yanğut Kilais ek nemunan penanaj mka keyet tonaj penaj mamain. Kawawanğagen nâmkijpepen tazin ke mkitikpem mamann nuknan sokbemndame katiknan bem tatnup beme nin ilak mka ke nembon benup.

Islael am keñ katik mambien nin sepem kegok ku mbanup

⁷⁻⁸ Keyepmti Emetak Ten egan zet kapigok zeye ke in nâseip,

“Alak kapi in zetnan nâseip beme in msat tunğupman tetimaemae sokbeme nenzinziñ palen kwitnan kwitnan mbien kegok mti keñ katik in ku mbep. ⁹ Yeñ sokñine ekñenan Neñ msat tunğupman ke nup kan 40 menok ma nenzinziñ kogogak mkwapma eknâmamkwebien. Yanğut ekñenan neñ mobotnan omba mnamkwati yanñ mnik kwabien. ¹⁰ Âpme neñ keyet nâmsopkumindemti pigok zewan, ‘Kan katan keñ otnânâñin kilen mapeme mekozin mme ekñenan nâlen set ke nen ku ekmâtâbien.’ ¹¹ Kegok mbiengapmti neñ ekñengat nenzinziñ mindamti zemkatik bembe pigok zewan, ‘Ekñenan nâlen kâtnânâ msatnan ke ku mebep. Yek penaj.’”

(Sam 95:7-11)

12 Kilaismagen notnne, inmagengatnaŋ ŋenaŋ nâmkîŋpepe katikpemtî keŋaŋ bekaŋaŋaŋ etaŋ bemisikme Kawawaŋ mama toŋaŋ ek bankumpenakmagengat eksemambe.

13 Kawawaŋ kan delaŋ zenzenaŋgat zempeye ke nin ku nânuŋ keyepm nin keŋ katik ku mti mamabanuŋ ma Sadaŋ nâmpeman tetimaeen ndatowewegalen kawaŋaŋ ku sawanuŋ. Kegogapmti nâmkîŋpepeen mamayet notn mukulem mukulem mti mabanuŋ.

14 Nin nâmkîŋpepeen alagak kwabenen ke ewe mkipmaŋ bemi manepemann gakikiyaŋ ndaaikbe. Mti Kilaisiyaŋ ndamukulem mbe ke penaŋ nâmkatikbemi mabanuŋ. Nin kekok mbanuŋ beme nin Kilais egalen animbi penaŋ bewanuŋ.

15 Kawawaŋgalen zelen kapigok zenzenaŋ,

“In yeŋsokŋineyaŋ Kawawaŋaŋ zet zeme nâmtiŋgut keŋin katikŋaŋ beme ŋenzinziŋ palen mamkwabien sepem kekok in egalen zetnaŋ alak pigogat nâmti keŋ katik palen ku mambep.”

(Sam 95:7-8)

16 Am kwi ekŋenaŋ zetnaŋ nâmtiŋgut bankumpemti egat ŋenzinziŋ mbien? Ke animbi Mosesiyaŋ ŋeŋaŋ bemindame Izip msat katikpemtî kobien ekŋen keyaŋ kekok mbien.

17 Ma am kwi ekŋengat Kawawaŋaŋ nup kan 40 keyet keŋanen nâmsopkumindeye? Ke am yom sepem ikŋak ikŋak mti msat tuŋgupaŋ gakim walet mbien ekŋengat kekok mge. 18 Âpme am deset ekŋengat Kawawaŋaŋ zemkatik bembe zet kapigok zeye, “Nâlen kâtnânâ msatnanen

ku mebep?” Zet ke am egalen zet kulumti mambien ekņengat nâmti zeye. ¹⁹ Keyepmti nin pigok penaņ nâņup, ekņenaņ ku nâmkijpewien keyepmti ekņenaņ Kawawaņgalen kâtnânâ msat dolakņaņ keyet keņan ku mebien.

4

Kawawaņgalen am nin kâtnânâ msalen mebegat zemdenderaņ

¹ Kawawaņgalen kâtnânâ msalen mebegat zetik mge ke ku asekmē delañ zemâge. Alak pigogat ewe tazin keyepmti inmagengatnaņ ņenaņ ku nâmkijpēmti selen met yuņguwemagengat mama mimiņin eksemti mamambep. ² Kawawaņaņ zetik mimindaye sepem keyegak nin zetik mimindain. Egaņ zetik mimindame keņinan penaņ ku bempewiengapmti ekņenmagen penaņaņ ku sokbeye. Zet zemkatik bembenaņ ke nâmkijpēmti ku timambien. ³ Nin animbi nâmkijpēpemaņa Kawawaņgalen kâtnânâ msat keyet keņan tapmetnup. Eweņa Kawawaņa kâtnânâ msat keyet pigok zeye,

“Neņ keņ kasa beme pigok penaņ zemkatik beyap, ‘Ekņenaņ nâlen kâtnânâ msalen kapi penaņ ku kobep yek penaņ.’ ” (*Sam 95:11*)

Eweņa Kawawaņa msat mge kan keyet kâtnânâ msat ke kegogak beye yaņgut amnaņ ke mesâgât ku manâmkijpeip keyepmti egaņ kogok zeye. ⁴ Âpme msasa 7 keyet keņan kwep delañ zenzeņaņgat kapigok zeye,

“Kawawaŋaŋ mulup sambe ke kasup mulup mimi 6 mme delaŋ zemâpme msasa delaŋ zenzeŋaŋ 7 keyet egaŋ kâtnâm tage.”
(Sokbembe 2:2; Kisim Bek 20:11; 31:17)

⁵ Âpme zet keyegak ŋen ewe kapigok zeye,

“Ekŋenaŋ nâlen kâtnânâ msalen kapi penaŋ ku kobep yek penaŋ.” *(Sam 95:11)*

⁶ Âpme pi am notnaŋ tatnup nin kâtnânâ msatn keŋan mebegalen setnaŋ notnaŋ ŋep tazingapmti keŋan mobanup. Kogok keyaŋgut am tipman baenen mamkwabien ekŋenaŋ zetik mimi-dame nâmbienaŋgut ku gawepuwien keyepmti ekŋenaŋ kâtnânâ msat keŋan ŋep ku mebien.
⁷ Keyepmti Kawawaŋaŋ kan ŋen ewe beye, ke bemti kan keyet kwitnaŋ “Alak” kumti kâtnânâ msalen mebegalen zetik mge ke ewe ŋandem tage. Yaŋ mamkwati Kawawaŋaŋ zet ŋen Dewit egat keŋan beme egaŋ zet zein kegok zeye.

“Alak an ŋenaŋ Kawawaŋgalen zetnaŋ nâsem beme keŋaŋ katikŋaŋ ku aŋgalaŋ tasem.”
(Sam 95:7-11)

⁸ Âpme Zosua egaŋ am kâtnânâ msalenan Kawawaŋaŋ zetik mimindeyeen indapmege. Ke etaŋ benak beme Kawawaŋaŋ zigoset kâtnânâ msat ŋen ewe tazingat zeme Dewilaŋ zeye? ⁹⁻¹⁰ Eweŋaŋ Kawawaŋaŋ mulup sambe mme delaŋ zeme tagom tage kegogak an ŋen Kawawaŋgalen kâtnânâ msat keyet keŋan mebeyaŋ mulupmaŋ mdelaŋ zemti kâtnâwe. Kawawaŋgalen am ekŋengalen kâtnânâ msat ŋen ewe tazin sepem Kawawaŋaŋ tambu msasa 7gat kâtnâyeen kegoknok ekŋenaŋ kegogak

makâtnâip. ¹¹ Kogogapm ninmagen ñeñañ zet kululu keyelen mama mimi ke mâti mambeyet am eweñañ mbien kegogak ku mbep. In kâtnânâ msalen mebegat Kawawañañ mama mimi nâmtikñañ mamin ke windeñañbenj mbep.

¹² Kawawañgalen zet ke windeñañmak ma amgat mamañinan mulupmañ mamnen wanam kukñañbenj kukñañ bameset eyo tazin keboñ. Keyañ am kenjin añme epeeme amgat yañañin sosok mamsokbein. Mti wanamañ kanziñañgalen kelakñañañ ma kanziñ olalañañ añañmann bikpempti mamekazin keboñ. Kawawañgalen zelañ ammagen kegok mti kenjinañgalen ñoktik yañañ yañañ maenzilim tamezin ke yañañin mamekzin.

¹³ Âpme kwitnañ kwitnañ aiikñañ keyañ Kawawañgat zikatnan enzilimti ñen ku matazin. Ekmagen kwitnañ kwitnañ sambe ke sosok etañ mawemâzin. Egat zikatnan nin nnañgat yaññ zemkawañbemâbanup.

Zisas ek ningalen sâpe sâpe bumbuyelen an ñeñañ teman

¹⁴ Ningalen sâpe sâpe bumbu an ñeñañ ñen tatndain ek kululuñ mka keyet keñañ penañ mepmoge ek Zisas Kawawañgat Nemuñañ keyepmti nin nâmkijpepen manzemkawañ benup ke mimkatikñañ bempti mambanup. ¹⁵ Nin yomgalen windeñañ kumann tototgalen winden ku tatndain yañgut sâpe sâpe bumbu an ñeñañ egañ tetimaemae sambe ninmagen masokbein ke ekmagen kegogak sokbemâpme delañ zemâge yañgut egañ yom ñen ku mge. ¹⁶ Keyepmti

nin Kawawaŋgat kiŋgagapiŋ ekmagen sokŋan mebanup. Zisasiyaŋ Kawawaŋ an keŋ taolet toŋ egalen mundum windeen totazingapmti nin nukŋaŋ ŋen ndaikme ekmagen mepmann keŋ taoletnaŋ ma aŋgalaŋ gogotnaŋgat penanaŋ ndamukulem mimndewe.

5

¹ Sâpe sâpe bumbu an ŋeŋaŋ indaik indendeŋaŋ ekŋenaŋ amgat munduminan Kawawaŋgat zikatnan meti yomgat sâpe sâpe mambumtemien ma tewalaŋ timet bembeyet zemindendeŋaŋ. ² Sâpe sâpe bumbu an ŋeŋaŋ ikŋaŋ an penaŋ yomgalen tetimaeen ŋep tokukuyelen keyepmti am yomgat yaŋaŋ penaŋ ku nâmti yom mti set penaŋ katikpemtî ŋenen mebien ekŋengat ŋep sewakŋaŋ mamindain. ³ Keyet yaŋaŋ kapigogapmti am ekŋengalen yomgapmti etaŋ yek ikŋaŋgat eyo nâmti bumbuyet zempepeŋaŋ. ⁴ Mulup mobotnaŋ keboŋ ke an ŋeŋaŋ keŋagalek ikŋak ŋep ku mimiyelen. Sâpe sâpe bumbu an ŋen Kawawaŋaŋ aikpemtî mulup same ŋep penaŋ mbe. Egaŋ Alongat setnaŋ munduman mâti kekok ke mpeye. ⁵ Sepem kekok Kilais ek ikŋaŋgat nâme mobotnaŋ beme sâpe sâpe bumbu an ŋeŋaŋ temaŋ ku beye. Ke Kawawaŋaŋ pigok zemtî zempeye,

“Alak neŋ gâgât kapigok zemkawaŋ besâwap,
‘Geŋ nâgât Nemun penaŋ.’” *(Sam 2:7)*

⁶ Mti naman zet ŋen Zisasiyaŋ sâpe sâpe bumbu an bembeyet ewe kapigok zeye,

“Geŋ Melkisedek nembonj sâpe sâpe bumbu An
 ŋeŋaŋ kwesiŋ kwesiŋ mamti mambanik.”
(Sam 110:4)

⁷ Zisas ek msalen manje kan keyet An
 gakikiengatnan mme belek zem wawagalen
 winde tasaye egat Gesemani muluwen dundundu
 mge ke ŋakŋak palen omba penaŋ sumti
 zeye, “Kawawaŋ napmukulem mne.” Kegok
 zeme Kawawaŋaŋ dundundunaŋ nâmpeye
 enenogat egaŋ Kawawaŋgat kandaŋaŋ mtot
 meti pedondom saye keyepm Kawawaŋaŋ
 winde same kiŋgagaŋiŋ gakikien moge. ⁸ Ek
 nemunaŋ penaŋ manje yaŋgut egaŋ sindem
 tiye keyaŋ egalen zet gawepupunaŋ keyet yaŋaŋ
 tasaye keyepm mgwatnaŋ mge. ⁹⁻¹⁰ Zisasiyaŋ zet
 gawepumti gakiye keyaŋ sâpe sâpe bumbu an
 dolakŋaŋ penaŋ kwage. Mti ek ke Melkisedek
 sâpe sâpe bumbu an temaŋ keyet kataŋ sâpe
 sâpe bumbu an ekŋengat ŋeŋaŋin mamayet
 Kawawaŋaŋ zempeye. Keyepmti am zetnaŋ
 maŋgawepup ekŋen ke yomengatnaŋ gilik
 zemindatitiyelen toŋin penaŋ bemti mama
 kanzizit mama ke maindain.

*Nemba isisik ekŋengalen mama mimi keyet
 kataŋ ku mambanup*

¹¹ Melkisedek egalen zet omba penaŋ tazin
 yaŋgut in wakŋin bekekme mamaip keyepmti
 zet sewak sewak tadiidomopma nâmbep. ¹² In
 kan teepmaŋ nâmkŋepepe aikbien mme no-
 lineyaŋ mama keyet yaŋaŋ zemzikat indawien
 kogogapm an zet zikat indanda ŋep kwabiek
 keyaŋgut in zet ke wisat palen tati yaŋaŋ penaŋ

ku nâmâtâbien keyepm am notnaŋaŋ in ewe Kawawaŋgalen zet ŋotekŋaŋ ke ewe zemzikat indame weyaŋnâmâtâbep. In ewe nam etaŋ niniyelen beip; meu katikŋaŋ ŋep ku niniyelen. ¹³ Am nam manip ekŋengat nempa okak kegok manzeip, ekŋen keboŋaŋ set de pembeŋaŋ ma de bekaŋaŋ ke ŋep ku maekmâtâlip. ¹⁴ Meu katikŋaŋ ke am semem delaŋ zenzeŋaŋ ekŋengalen zapat. Keŋinan nâmâtât talipgapmti bekaŋaŋ ma pembeŋaŋ ke kalaŋ kumti maegip ekŋen keboŋ keyaŋ meu katikŋaŋ niniyet zapat beip.

6

Nin nâmkinpepeen semem katikŋaŋ bemti mambanup

¹⁻² Âpme in alagak nâmkinpepeen kwati Kilaisiyelen zet zapatnaŋ yaŋaŋ imbelanaŋ nâmbien keyegak nâmti ewe belak etaŋ manâip ke peme tapme zet keyaŋ penanaŋ mimiyelen zein ke mâti mamambep. Kegok ke am nâmkinpepeen kaliŋaŋ kwabien ekŋenaŋ kegok mamip. Zet alagak nâmbien ke kapigok: mama mimi bekaŋaŋaŋ indamandame gakikiyet zapat mambienen keyelen yomengatnaŋ keŋ gilik zenze zetnaŋ ma Kawawaŋ nâmkinpepeyet zetnaŋ ma tu zululugat yaŋaŋ nânâyet muzikat indandaŋaŋ ke ma am nâmkinpepeŋinmak belin ŋokŋinan atata ma gakikiengatnan wawagalen zet ma am Kawawaŋaŋ zet zemdelaŋ zenze muluwen tabepgat zetnaŋ. In zet keboŋ ke etaŋ sakwalambemti zenzeyak windenaŋ ku

mbep. Zet nâmkinpepeen mama mimi tototnañ mimiyelele ke zenâmti nâmkinpepenin mkaliñ bembeyelen wemezin ke zenâ zenâ mti semem kaliñ bewep. ³ Nin kekok mimiyet Kawawañan winde ndame timamti semem kaliñ bewanup.

⁴ Neñ kekok zeyeyangut ñen ewe kapi zesowap. Am notnañ Kawawañalen Zet keyañ keñin melen belem beme Zisasiyan ekñengot yominangot gakiye kekok nâmkinpewien. Kekok sokbeme am ekñen ke Kawawañan Emetak Ten indaye. ⁵ Ma Kawawañalen Zet Zapat Dolakñan Penan ke nâme keyañ keñinan mealat mepme Kawawañan menok notnañ bangat sokbewe keyet katañ mme ekmâtâlip. ⁶ Am ekñen kemagen kwitnañ kwitnañ kekok sokbeme ektingut ekñenan Zisas penan sukwep bamkumpewien keyañ ekñen Kawawañat Nemunan ilinak keñinanek ewe tewen kumasasokpewienok beye. Mti am sambe zimoselinan egat kwitnañ mtopewien. Am kebon ke yomengatnañ keñ gilik zenzeyelen setnañ ñen ku taindain penan.

⁷ Msat ñen map topen tati kwitnañ kwitnañ mme dolakñan kwapme am mulup mamip keyañ meu ma sikokok matinip. Ke Kawawañ egalen tebumolet temañ keyet penan ke masokbe-mindain. ⁸ Ma msat ñeniñaset nusi temañ kalak zewenn keeset penanepin keyepmti bam msat ke Kawawañalen wepuwaliliyan dukñan mopme tewen zim tobe.

Nin winde kumann kwapme mambanup

⁹ Notnne penañ, neñ ingat zet kiñgagatgalen zema manâip keyepm keñ zut ku miap kegogat in set pembenaset mebep e nâyap. Set pembenañ mebep ke Kawawañañ indaangalañ indewe kogok. ¹⁰ Kawawañañ kwitnañ kwitnañ mamnen teñ etañ. Keyepmti egañ in mulup dolakñañ mbien keyet ku kandatin-demâbe. In Kawawañgat nâmtikñañ mpeme keyañ keñin melen belem mimindeme in egalen am indamukulem mbienok mmobep. ¹¹ Âpme nin in mulup windemben kegok etañ mimiyet nâmindenup mti nâmkijpepeñin mkatikñañ bemtati Kawawañañ kot indatim mobogat damuñ tabep. In kegok mti webematalip keyet penañañ indamâbe. ¹² In am nâmkijpepeñin kaliñañ ma maip ekñengalen mama mimi ke mâti mti wisat sakwep ku mbep. Ekñenañ Kawawañañ kwitnañ kwitnañ ikñañgat nemuñene indandayet zetik mge ke timalip.

Kawawañgalen zetik ke penañañmak

¹³ Ekñenmagen ñen Abalaam ek Kawawañañ zetik mti an mobotnañ kwiyet kwitnañ kumti zemkatik besap zem mgeyañ yek beme Kawawañañ ikñañgat kwitnanen bemti pigok zemkatik mti ¹⁴ pigok zeye,

“Neñ penañ sukwep gwetnañ mgemti inşokdine sambe sopmañ penañ gawap.” (*Sokbembe 22:17*)

¹⁵ Âpme Abalaam ek zetik mge keyet damuñ kan teepmañ wisatnepiñ mamkwatneti bam penañañ aige.

16 Am nin amobotnaŋ ɲeŋat kwitnanen zetik minn beme zet zen ke bandim mti mmann am nâyo keyaŋ ningat zet bamset ɲen ku zewep. 17 Keyepmti Kawawaŋ ek am zetik mi-mindame keŋ zut mbiekmagengapmti zetikŋaŋ mkaliŋaŋ bembeyelen zetik notnaŋ omba penanaŋ ikŋaŋgat kwitnanen mge keyet penanaŋ nin tiwanup. 18 Kawawaŋaŋ zetikŋaŋ mam ma zemkatik bembe ɲen mamm ikŋaŋgat kwitnanen eget zut keyet Kawawaŋaŋ dâsuki ɲep ku zenzeyelen. Zetikŋaŋmak zemkatik bembenaŋ penanaŋ masokbein. Keyepmti animbi nukŋaŋinmak kunzuŋti Kawawaŋmagen mepme egaŋ maenzilim indeingapm ekŋen keŋ oloŋen palen tatagalen. 19-20 Sâpe sâpe bumbu an ɲeŋaŋaŋ Zelusalem sesewat mka keŋan ikŋak ɲen mamotan sepem kogok Zisasiyaŋ kululuŋen Kawawaŋgat ɲenzimosetnan mogeyaŋ nin ndamukulem mti ndadamuŋ mam. Egaŋ sâpe sâpe bumbu an ɲeŋaŋ ɲen kwesiŋ kwesiŋ maŋge Melkisedek keboŋ. Keyepmti nin Zisas mâti egaŋ mundum dolakŋaŋ motapmainen mosâgât webepen mamambanup.

7

Melkisedekmak Kilais egetgalen sâpe sâpe bumbu muluwit yaŋaŋ sepem kwep

1 Melkisedek ek Salem mkaengalen amobotnaŋ maŋge ma Kawawaŋ Amobotnaŋ temaŋ egalen sâpe sâpe bumbu mulup keyet anaŋ kekok maŋge. Egaŋ Abalaam met amobotnaŋ kasaŋane

indomindamâti gilik zemkopme an keyañ met sellen aikti zengwatnañ mpeye. ² Mme Abalaam ek milawat sambe kasañane ekñenmagengatnañ indamâti timkoge ke kalañ kumti mañge 10magengatnañ kwep keyet katan Melkisedek saye. Nin zetnaset kwit Melkisedek ke gilik zewennegen kapigok benak: “Tengalen Amobotnañ” ma kwitnañ ñen Salem mkaengalen* amobotnañ kwit keyet yañañ kapigok zenzeyelen, “Mamasiyelen Amobotnañ.” ³ Melkisedek ek mamañ bipmañpiñ ma yeñsokñañ mee ku zemkawañ bembenañ. Ek mamañañ ambege keyelen kanañ ku nâip ma gakiye keyelen kegogak kanañ ku nâip.† Ek Kawawañgalen Nemuñañ keyet sesepmañ sokbembeyet zenzeñañ keyelen sâpe sâpe bumbu An ñeñañ mulup kwesin mti mañge.

⁴ Nin pigok nânup Melkisedek ek an tototnañ yek; ek amobotnañ temañ keyepmti ningat yeñsokñ Abalaam egañ milawat dolakñañ etañ kalañ kumti mañge 10magengatnañ kwep egat saye. ⁵ Abalaamgat inñsokñañe am mañge temañ kogogapm am mañge Liwai zep ekñenañ sâpe sâpe bumbu mulup ke mimiyet zemindendeñañ. Âpme Abalaamgat inñsokñañe am mañge notnañ ekñenañ Liwai am mañge ke indikdamuñ mimiyet milawalin mañge 10magengatnañ kalañti kwep indandayet zii zelen zemâtâtâtnañ. ⁶ Yañgut Melkisedek ek Liwai am mañgeengatnañ

* **7:2:** Kwit kapi Zelusalemgat kwitnañ itnañañ penañ kum mamañañ. † **7:3:** Melkisedek egat mamañ ma bipmañ ma yeñsokñañeyet Kawawañgalen zelen yañañ ku kukuñañ yañgut mulupmañ mgeyeen Zisasiyañ mbe keyet katan mge.

ku sokbembenan. Keyangut Abalaam an zetik mpepenan ekmagangatnan milawat manje 10 keyetnan kwep ke etan Melkisedek same egan zemgwatnan mpeye. ⁷ Amobotnanan an tototnan zemgwatnan mamimindeip. Set kekok tazingapmti Melkisedegan Abalaam zemgwatnan mpeye keyan zeinen Melkisedek ek amobotnan. ⁸ Israel an eknenan milawalin kalan kume manje 10 mopme manje kwep timtati Liwai maindamtemien. Am manje ke mamoti an penan bemti magakimtemien. Âpme Melkisedegan milawat manje kogok titinanangut Kawawangalen zelan egat pigok zenenan ek mama kanzizit tapmain. ⁹ Nen zet keyet yanang nen pigok nâyapgapm zewi. Zuda am eknenan Liwai eknen milawalin manje 10magangatnan kalan ti kwep maindamtemien. Yanangut Abalaam ek Liwai ekngat yeningangut egan naman milawatnan manje 10magangatnan kalan ti kwep Melkisedek saye ke Liwai eknenan ku mamtemien ke yeningan mge. ¹⁰ Enenogat kekok zenup? Melkisedegan Abalaam selen met aikge kan keyet Liwai am manje eknen ku sokbewienangut yeningan Melkisedek saye keyan eknenan mbienok bein.

Sâpe sâpe bumbu an alaknanan itnanangalen mundum timâbien

¹¹ Liwai sâpe sâpe bumbu an muluwin mkwabien ke zii zelan zein katan mâti mme keyan am sambeyelen yom zulutme delan manzem manak ze Kawawanang sâpe sâpe bumbu an nen ku aiknak. Yanangut egan sâpe sâpe bumbu

an ñen Melkisedekgat sakam mwatomzempeye. Kewan Alongat sipmañ butnañ mâti aiikgalen zii zelañ zein katanñ ku mimiñañ. ¹² Alongat insoñneyañ sâpe sâpe bumbu an mamayet Mosesiyañ zemkaliñ beye kelak asesekñañ mme zii zelañ mulup keyet zet zemâtâtâtñañ ke kogogak asekmâzin. Mme sâpe sâpe bumbu an kwakwagalen Kawawañañ setnañ alakñañ zuluzin. ¹³ Kawawañañ sâpe sâpe bumbu an mwatonzempepâpm ke Liwai am mañge ekñenmagatnañ yek. An ke am mañge ñenmagatnañ sokbeye. Egat yeñene ekñenañ sâpe sâpe bumbu an mulup ñen ku mbien. ¹⁴ Amobotnañ ek Zuda mañgeengatnañ sokbeye ke nânup. Âpme Moses egañ an mañge ekñen keyañ sâpe sâpe bumbuyet mulup zet ñen ku indaye. ¹⁵ Pigok penañ sokbemkawañ bein sâpe sâpe bumbu an kwakwagat Mosesiyañ zii zelen zemâtâtê ke ilak asekin mme sâpe sâpe bumbu an alakñañ Melkisedekgat sakam sokbein ke Zisas. ¹⁶ Ek Alongalen sip mâti sâpe sâpe bumbu an ku kwage. Kawawañañ sâpe sâpe bumbu an ñeñañ onzempeye enenogat egañ gakikiengatnañ wati gakikiyet winañañ mtotpeyeyepm mulup ke saye. ¹⁷ Kawawañañ keyet pigok zeye,

“Geñ Melkisedek sâpe sâpe bumbu an ek keboñak tapmeti mamambanik katikñañ.” *(Sam 110:4)*

¹⁸ Keyepmti zii zetgalen zemâtâtât eweñañ zenzeñañ ke winañepiñ ma penañepiñ beye keyañ nin yomengatnañ ñep ku ndaangalañ ndendeyelengapm kapume keñañ motazin. ¹⁹ Zii

zelaŋ an mukulem mpeme Kawawaŋmagen sokŋaŋ ŋep ku mege keyepmti Kawawaŋaŋ set ŋen aikge keyaŋ dolakŋaŋ penaŋgat dolakŋaŋ bein, eneyet set keyaŋ katnaŋ bem ndamandame Kawawaŋmagen sokŋanik mametnup. ²⁰ Kawawaŋaŋ Zisas sâpe sâpe bumbu ŋeŋaŋgalen mulup mimiyet zempeye ke belak etaŋ penaŋ ku zempeye. Kawawaŋaŋ Nemuaŋaŋaŋ mulup ke mimiyet zet penaŋ ikŋaŋgat kwitnanen zemkatikŋaŋ bemeti zempeye. Sâpe sâpe bumbu an mamkwabien ekŋen zemkatikŋaŋ bemindeme mulup ke ku mbien. ²¹ Zisas ek Kawawaŋaŋ ikŋaŋgat kwitnanen zemkatik bemti sâpe sâpe bumbu an onzempeye. Mti Kawawaŋaŋ pigok zeye,

“Amobotnaŋ zemkatik bembe zet zeye ke penaŋepiŋ ku bewe. ‘Geŋ sâpe sâpe bumbu an ŋeŋaŋ mameti mamambanik.’”
(Makuku 23:19; 1 Samuel 15:29; Sam 110:4)

²² Keyepmti nin kapigok nâsenup, Zisasiyaŋ tâtâ alakŋaŋ aige ke dolakŋaŋ penaŋ. Keyaŋ tâtâ tipman baen wemkwege ke sebempemti mobotnaŋ ŋen tazin.

Zisas sâpe sâpe bumbu an egaŋ ŋep ndamukulem mimndewe

²³ Eweŋan baenen an sambeyaŋ sâpe sâpe bumbu an mamkwabien yaŋgut ŋeŋaŋ mameti gakime ŋeŋaŋ kegok mkwabien. ²⁴ Keyaŋgut Zisas ek mama kanzizit mamain keyepmti sâpe sâpe bumbu mulupmaŋ ke kwesiŋ kwesiŋ wemeti wembe. ²⁵ Ma Zisasiyaŋ kogogak kwesiŋ kwesiŋ mamti ningat Kawawaŋ mandundum

sain kegogapmti nin Kawawaŋaŋ ndamukulem mindendeyelen nâmti sokŋanik mepmann Zisasiyaŋ ɲep aŋgalaŋndendeyelen.

²⁶ Ningalen sâpe sâpe bumbu an ɲeŋaŋ alakŋaŋ ek keboŋaŋ ɲep penaŋ ndamukulem mamin. Ek mamaŋaŋ kwetetepmaŋ, mimyugugunepiŋ, ek teŋ penaŋ. Ma Ek yomaŋ ɲen ku tazin yek penaŋ. Ek am yomtoŋ ekŋenmagangatnaŋ Kawawaŋaŋ kalaŋti iŋŋak onzempeye. Egaŋ kululuŋen gwaen Kawawaŋmak motazin. ²⁷ Ek sâpe sâpe bumbu an ɲeŋaŋ mamkwabien ekŋen keboŋ yomtoŋ yek. Ekŋenaŋ kasup ɲen kasup ɲen ilinaŋgat yominaŋgat sâpe ɲeŋaŋ bumtiŋgut amŋine ekŋengalen yomgat bam mambumtemien. Yaŋgut Zisasiyaŋ iŋŋaŋgat keŋaŋ sekŋaŋ keyaŋ am ningalen yomgat sâpe sâpe sek kwep bume keyaŋ sâpe sâpe bumbu mulup ke ilak mdelaŋ zeyeyaŋ matatmopmambe. Ke iŋŋaŋgat gakikiŋaŋ. ²⁸ Mosesiyelen zii zelaŋ sâpe sâpe bumbu an maombemindemtan ekŋen ke an yomtoŋ. Yaŋ zii zetgat baman Kawawaŋaŋ iŋŋaŋgat kwitnanen zemkalinbemti Nemunaŋ Zisas sâpe sâpe bumbu an ɲeŋaŋ onzempeye. Egaŋ sâpe sâpe bumbu mulup ke ɲep penaŋ mdelaŋ zeyeyepm kwesiŋ kwesiŋ mamti mambe.

8

Zisas tâtâ alakŋaŋgalen sâpe sâpe bumbu an ɲeŋaŋ tazin

¹ Zet zemkokotnaŋ keyet penaŋaŋ kapigok: Ningalen sâpe sâpe bumbu an ɲeŋaŋ bemndemti matazin Zisas ek kululuŋen gwaenen Amobotnaŋ

Temaŋ Kawawaŋ kwizet buŋamaŋmak egalen mundumen moti betnaŋ penaŋset windeyelen mundumanen mogeyaŋ tazin. ² Egaŋ kululuŋen Kawawaŋgalen sesewat mka keyet keŋan sâpe sâpe bumbu an ŋeŋaŋ mulup mamin. Sesewat mka ke amnaŋ ku walalatnaŋ; Amobotnaŋaŋ iŋkaŋ zeme weŋge.

³ Sâpe sâpe bumbu an ŋeŋaŋ ekŋen sambe meu ma soŋgom notnaŋ sâpe sâpe bambuyet ma tewalaŋ bembeyet zemindendaŋ. Kegogapm Zisas sâpe sâpe bumbu an ŋeŋaŋ egaŋ sâpe sâpe buye. ⁴ Mti ek msalen alak kapi manak ze sâpe sâpe bumbu an ku manak. Msalen zii zelen zein keyet kataŋ sâpe sâpe bumbu an ekŋenaŋ sâpe ŋep mambuip. ⁵ Sâpe sâpe bumbu an ekŋenaŋ muluwin sesewat mka weŋaŋ ma sesepmaŋ walalatnaŋ keyet keŋan mambuip. Âpme sesewat mka penaŋaŋ ke kululuŋen gwaen tazin. Moses egaŋ sesewat mka zegwem zegwem time mosâpme Amobotnaŋaŋ pigok dunduye,

“Nânik kalaŋan gwaenen sepemaŋ zikat game ekbanan keyet kataŋ walabanik.” (*Kisim Bek 25:40*)

Tâtâ alakŋaŋgalen zet

⁶ Tâtâ alakŋaŋ keyaŋ tâtâ itnaŋaŋ sebempeti mobotnaŋ tazin. Ma Zisasiyaŋ tâtâ alakŋaŋ keyelen an tuŋgupmaŋ mobotnaŋ tati tâtâ itnaŋaŋgalen sâpe sâpe bumbu an ŋeŋaŋ mambien ekŋen kegogak sebemindem tazin. Ma zemkatik bembe eweŋan mimiŋaŋ keyelen zetikŋaŋaŋ zemkatik bembe alakŋaŋ kapiyelen

zetikmak sepem kwep ku belup; alakñañañ sebe-
mpein. ⁷ Eweñañ tâtâ itñañañ wenje keyañ
am mme dolakñañ bewien ze tâtâ alakñañ ñen
ewe sokbembeyet zetñañ ñen ewe ku sokbe-
nak. ⁸ Kawawañañ amñañeyañ myunğum same
keyepmti pigok zein,

“Kan ñen neñ nâmtalap ke sokbeme neñ tâtâ
alakñañ Israeal am ma Zuda am ekñenmak
msowap. ⁹ Eweñañ yeñsokñine Izip
msalengatnan indatimti msalanan met
indesâgât meti tâtâ ekñen mindewan
keyet katan alakñañ mbap eyañ itñañañ
sebempewe. Ekñenañ tâtâ keyet keñan
nânâñ ku mambien keyepmti neñ
bamkumindewan. Neñ Amobotñañinañ
zet kekok zeap. ¹⁰ Neñ bam Israeal am
ekñenmak tâtâ alakñañ msât zewan ke
kapigok, Neñ nâlen zii zet ñen ñoktikñinan
bemindewap. Ma keñinan kumpema tabe.
Mme neñ Kawawañin mambap âpme
ekñenañ nâlen aminne mam nembep.
¹¹ Âpme an ñenañ notñañ ñen ma meniñañ
ñengat pigok zemti ku zemzikat sampewe,
‘Geñ Amobotñañ egat yañañ weyañ
nâmbek,’ kekok ku zewe yek. Kan keyet
am sambe tototñañ ma mobotñañ ekñenañ
nâgât yaññ nâmâtâpme delañ zemâpbe.
¹² Ma neñ yomin ma myunğunğunğin
sambe katikpemâbap. Mti kandatnome
mamambap.” *(Zelemmaia 31:31-34)*

¹³ Âpme Amobotñañ egañ tâtâ ke mti keyet,
“Alakñañ” zeye. Kekok zemti itñañañ tâtâ tage

keyet tanġanaġ zeye. Âpme kwitnaġ kwitnaġ tanġanaġ benti maetimben ke belaknik tati ilak endeletme mandelaġ zein.

9

Kawawaġalen sesewat mka zegwem zegwem

¹ Tâtâ itnaġnaġ Kawawaġ sesewatsasayelen setnaġ tageen ke mâti mkaġnaġmak ma mundumaġ sesewat mka zegwem zegwem msalen tage keyet mamtemien. ² Sesewat mka zegwem zegwem ke teepmaġ walati keġnaġ kutume zut beye. Keġnaġ ġeġnaġ keyet “Kambukġnaġ” kuwien keyet meu bem nini mundumaġ tage keyet palen nupmamaġ Kawawaġgat zapat mambumbemtemiengalen mundum ma taġam bumbuyet mundumaġ golaġ weyayaġan kogogak matatan. ³ Âpme saġgum teepmaġ tuġgupman ke opem peme totapme mka keġnaġ ġen ikġak enzililiġan keyet kwitnaġ “Keġnaġ Kambuk Penanaġgat Kambuk” keġok kuwien. ⁴ Keyet keġan kasak sesikġnaġ dolakġnaġ bumbu keyelen mundum golaġ mpewien. Ma Kawawaġnaġ tâtâ amġanemak mti zii zet indaye keyelen bogis beke keyegak tapme pusekġan golaġ weyaġti ambulutpeme matatan ma keyet keġnaġ Alonġalen toġge eweġangataġnaġ petnaġnaġ mġe kemak nanaġ palen zii zet kukuġnaġ ma mana selikġnaġ golaġ weyaġti mana wepewien kemak eyo tâtâyelen bogis keyet keġnaġ ilinsakwep be-mpepeġnaġ. ⁵ Tâtâyelen bogis keyet sakġanen gwaen ensel zut weyaġideme eġegat pâwidanaġ bogis ke maambulutatemun keyet dukġanen sâpe

sâpe bumbu an ñeñañañ nup kan katanj amgat yomin Kawawañañ katikpepeyet nâmti songom sipmanj anğalanj gogot mundum zenzenañ bogis dukñanen matatan keyet palen matetelimtemien.

Sesewat mka zegwem zegwem keyet zap-
atnanj eneyet esemteñ mmann delanj zesem.
⁶ Kwitnanj kwitnanj kekok bempeme tapmepme
keñañ ñeñañ keyet sâpe sâpe bumbu an ekñeñañ
mobot toti muluwin ke mamtemien. ⁷ Mka
keñañ kambuk penañañğat kambukñañ keyet
keñanen sâpe sâpe bumbu an ñeñañ egañ nup
kan kwep keyet keñañ sek kwewetañ mamotan.
Yañgut songom sipmanjpiñ yek, egañ sip timti
mot ikñañğat yomgat ma am yomtonj ekñeñğat
nâmti sip ke tetelime bogis dukñañ mundum
kwitnanj anğalalanj gogot makumtemien keyet
mamotan. ⁸ Emetak Teñañ pigok manzikat ndain:
sâpe sâpe bumbu anmak zii zetgalen zemâtâtât
egetgalen muluwit am ningat tunğupmnan tazin
beme nin Kawawañmagen mebeneknok sesewat
mka keñañ kambuk penañañğat kambukñañ ke
mebegalen setnanj mambekekzin. ⁹ Sesewat mka
zegwem zegwem msalen tazin kapi bam kulu-
lunjen katikñañ sokbewe keyet sesepmanj bein.
Mka zegwem zegwem keyet keñañ meu ma
songom timoti sâpe sâpe buwien keyañ zigoset am
Kawawañğat masesewatsamtemien ekñen keñin
mme kwetetepmanj benak? ¹⁰ Zii zet ke be-
lak sekgeset etañ, tu meuyelen zetnanj ma sekñ
tu zulutpepeyelen zetnañetañ tage. Penañañ
Kawawañañ msokbesâpmme tazin keyet sesep-
manj mkwabien.

Kilaisiyan ikɲaŋgat sipmaŋaŋ sâpe sâpe buye

¹¹ Kilais ek kwitnaŋ kwitnaŋ penaŋ sokbe-
mbeyet zenzenaŋ keyet sâpe sâpe bumbu an
ɲeŋaŋ beye. Mti Egaŋ sesewat mka sepemaŋ
igagen mobotnaŋ kululuŋen tazin keyet keŋan
mowege. Amnaŋ ku walalatnaŋ ma msalen
ku tazinen keyet keŋan mowege. ¹² Meme ma
makau sipmaŋ timti ku moge. Ikɲaŋgat sip-
maŋ penaŋ ke mka keŋan kambuk penaŋgat
kambukɲan ke mmoti sipmaŋ sek kwewetaŋ
tetelime mekoge keyaŋ tatat katikɲaŋ matak-
wazin. Sipmaŋ keyaŋ gakikiengatnaŋ ndatim
kwat ndeyeyaŋ alak mama kanzizitgat zapat tat-
nup. ¹³ Eweŋaŋ zii zelaŋ meme ma makauyet sip-
maŋ timoti teteliliyet zenzenaŋ ma makau gan-
denaŋ bume zime mupmapmaŋ timti kâ kwak-
watnaŋ ke tuyen time topme lumaŋti keyaŋ am
set zii mpepeŋaŋgalen aŋgosomti nukɲaŋ aiikɲaŋ
keyelen gwesep mti tetelime mekoti am keyaŋ
mimindeme am kwetetepmaŋ mambemtemien,
ke sekgeset etaŋ mme kwetetepmaŋ mamimin-
demtan. ¹⁴ Keyaŋgut Kilaisiyet sipmaŋaŋ soŋgom
ekɲengalen siwin sebempemti mobotnaŋ tazin e
egaŋ yom ɲen ku mge keyet penaŋaŋ. Kilaisiyan
mama keboŋ maŋge ke Emetak Teŋ mama kanz-
izit mamainaŋ winde same mge. Ma naman egaŋ
ikɲaŋgat mamaŋaŋ Kawawaŋgat sâpe sâpe nem-
boŋ sayeyepm egat sipmaŋaŋ nin zulutndeme
teŋ bewennaŋ Kawawaŋ mama kanzizit toŋaŋ ek
ɲep sisiliŋ mulup msawanup.

¹⁵ Keyepmti Kilaisiyan tâtâ alakɲaŋ keyelen
an tuŋgupmaŋ mobotnaŋ penaŋ beye. Mti tâtâ

itnananen mamti yom aik kwabien ke yek bembeyet iknan gakiye. Kogogapm am egat zapat ma maip eknan mama kanzizit mamayet zetik mindendenan ke nep mepmamambep. ¹⁶ Betzin tonan bembeyelen setnan kapigok, an nenan gakime egalen betzinan ke an nenan belak etan maekdamun min. Yan an titiyet nampepepan keyan damun tapmepme tonanan gakimenut an keyan matin. ¹⁷ Egan ewe alik mame betzingat zetnan zenzenan ke belak ewe tapme an keyan gakimenut zet keyet penanan nep sokbenak. ¹⁸ Kogogapm tatâ itnanan ke penananmak bembeyelen nambiengapmti songom kume sipmanan topme keyan penananmak mambemtan. ¹⁹ Moses ek zii zet sambe zemâtatpepepan keyet katan am sambe diindome delan zemâpme makau gandanngat sipman tumak lelimpeme tapme sindip palen sipsip zupman naman keyan zampemti keyan siwenn olekti Kawawangalen zet zapat meluwanmak mungununan palen ma animbi ekngat palen matetelimitan. ²⁰ Mti pigok diindoye,

“Kawawanan inmak tatâ mimiyet diindoye keyelen sip e ilak kapi.” *(Kisim Bek 24:8)*

²¹ Mti sesewat mka zegwem zegwem ma sâpe sâpe bumbuyelen batikondo mee ke keogok siwan tetelime sipsak mambemtan. ²² Ke zii zelen zenzenan keyet katan kwitnan kwitnan sambe katan siwan etan zulupme kwetetepman bemâge. Ma sippin keyan amgat bekananin zulupme delan zenzeyelen setnan nen ku tazin.

Kilaisiyan ningalen yomgat dopman gakiye keyan sâpe sâpe bumbuñanok beye

²³ Kwitnan kwitnan sesewat mka zegwem zegwemgat tazin ke penan kululunen gwaen tazin keyet sesepman kegogapm siwan tetelime dukñinan mopme kwetetepman bembeyet zenzenan keyet sâpe sâpe mambumtemien. Kogogapm am kululunen mebegalen ekñen mme kwetetepman penan bembeyelen sâpe sâpe sakaman igagen dolakñan penan bumbuyelen.

²⁴ Keyepmti nin nânup Kilais egan sesewat mka amnan belinan walalatnan keyet keñan kambuk zeip keyet sesepman msalen tazin keyet ku moge. Kawawanğalen sesewat mka keñan kambuk kululunen tazin keyet keñan moti Kawawanğat ñenzimoseñnan nin ndamukulem mimiyyet nâmti mandundum sain.

²⁵ Kilaisiyan ikñanğagak Kawawanğat sâpe sâpe sasayet sek kwep gakiye. Ke ewe sakwalambemti ku mimiyyelen. Kogok mti egan kululunen mogeyan tazin. Egan zii zelan zeinen sâpe sâpe bumbu an ñeñan egan nup kan sambe amgat yomin timti sek kwep mka keñan kambuk penanğat kambukñan zeiwem moti soñgom ekñengalen sip matimotemien keboñ ke ku mge yek penan.

²⁶ Kilais ek kekok mnak ze msat kululun sokbeye keyetnan kwazinen amgalen yomgat mti Kilaisiyan gakimti gakikiyegak mamananak. Yanğut kekok yek. Egan sek kwewetan gakimti yom sambe mkwakwatnan ma mimiñan ma mmobep ekñen keyet katan sek kwep dopmanin gakim delan zeye. Ñen ewe ku sakwalambemti gakikiyelen.

²⁷ Am sambe nin sek kwewetan gakiwanup. Mti

keyet baman daenen zet muluwen tabanup.
²⁸ Kegogapmti Kilaisiyan̄ ikñan̄gat palen am sambeyelen yom time mopme sek kwep gakiye. Kegok mgeyepm gilik zem kosâpmnen yom katikpepeyelen mulup ewe ku msâpm. Am egat nâmkiñpenti webem maip ekñen mama kanzizit indasâgât kosâpm.

10

Sâpe sâpe ñen̄an̄ mambumkwatemien keyan̄ yom ñep ku makatikpemtan

¹ Zii zelen sâpe sâpe bumbuyet zenzen̄an̄ ke kwitnañ kwitnañ dolakñan̄ bam sokbewe keyet sesepman̄ etañ mkwabien. Keyepm sâpe sâpe bumbu an ekñen̄an̄ zii zet gawepumti nup kan katañ sâpe sâpe bumti bumbuyak mkwapme am Kawawan̄ masesewatsantemien ekñen̄ keñin mme kwetetepman̄ tatat katikñan̄ ku matatan. ² Sâpe sâpe mambumtemienan̄ am mme kwetetepman̄ bewiek ze ekñen̄an̄ sâpe sâpe mene mene ewe ku mambumambiek. Keyan̄ am Kawawan̄ masesewatsaip ekñen̄ mme yompiñ sipman̄mak kwetetepman̄ bewiek ze ekñen̄an̄ yominan̄gat keñinan̄ nâmnukñan̄ ewe ku mbiek. ³ Sâpe sâpe kan ñen̄ kan ñen̄ mambumkwapme keyan̄ mme ekñen̄an̄ yominan̄gat manâmkwatemien. ⁴ Makau apman̄ ma meme egegat siwidañ yomin ñep ku zulupme delan̄ zemâtnak.

⁵ Keyepmti Kilaisiyan̄ msalen kogeem Kawawan̄gat zet pigok zeye,

“Geŋ songom kumti sâpe sâpe mambuip keyet tikŋaŋ penaŋ ku manânik. Yanŋut geŋ neŋ am sek kot mundunŋgat eweŋanagak weyaŋ bempemane tage ke koti mundunŋti sâpe sâpeyelen songomnok bema nome gakiwan. ⁶ Geŋ songom melesin ambepeme tewen motati zim totot ma amnaŋ geŋ yomin katikpepeyet nâmti sâpe sâpe bungame keyet nâmane tikŋaŋ penaŋ ku mambein. ⁷ Âpme nenaŋgat pigok zewi, ‘Kawawaŋ, nânik, neŋ gâlen zet gawepupuyet msalen toban. Gâlen Zet Itnaŋanen meluwaŋ mimiŋaŋ keyet penaŋaŋ ilak neŋ kapi kotalap.’ ” *(Sam 40:6-8)*

⁸ Sâpe sâpe bumbu keyet zii zelaŋ pigok zeye,

“Sâpe sâpe songom melesin ambepeme tewen motati zim totot ma amnaŋ geŋ yomin katikpepeyet nâmti sâpe sâpe sakam ikŋak ikŋak mambungaip ma tewalaŋ notnaŋ mamgaip keyet nâmane tikŋaŋ penaŋ ku mambein.” *(Sam 40:6)*

⁹ Kogok zemti naman zet ŋen pigok zeye,

“Kawawaŋ, nânik, neŋ gâlen zet gawepupuyelen msalen toban.” *(Sam 40:7)*

Egaŋ zet kekok zeye ke kwitnaŋ kwitnaŋ itnaŋaŋ mpeme mepme alakŋaŋ ŋen mwatonzempesâgât nâmtiyepmti zeye. ¹⁰ Keyepmti Zisas Kilaisiyaŋ ikŋaŋgat sekŋaŋ ke Kawawaŋ sâpe sâpenok ketalasim same keyaŋ nin keŋŋ mme kwetetepman bewen. Ke sek kwewetaŋ mge keyaŋgut keyet pembedaŋaŋ kwesiŋ wemti wembe.

11 Sâpe sâpe bumbu an sambe ekñenaj kasup ñen kasup ñen sesewat muluwin mti sâpe sâpe bumti bumbuyak mamkwetemien. Âpme keyañ yomin ñep ku peme mebegalen. 12-14 Kilais egañ yomgat sâpe sâpe gakikiñañaj mise kwep sâpe sâpe mambumkwatemienok bundelañ zemti an-imbî mme kwetetepmañ bewienañ ekñen kwe-siñ kwesiñ mambeþ. Ekñen egañ sâpe sâpe kwewetañ bumti mme dolakñañ etañ bemâpme gwaenen mogeyañ Kawawañgat betnañ penaset totazin.

“Mme mundum ke tapme Kawawañaj kasañane indatimti egat setnañ kandañan timot mulaloñ indeweyet damuñ tazin.” *(Sam 110:1)*

15 Keyet Emetak Teñaj Kawawañgalen Zet Itanañanen kapigok zemsokbemndain,

16 “Kan kapi delañ zeme neñ bam ekñenmak tâtâ alakñaj ñen mbap. Neñ zii zet zetn keñinanen bem indema tabep. Ma neñ zii zetn ñoktikñinanen meluwañ mpema tabe.” *(Zelemia 31:33)*

17 Mti Egañ ewe zet pigok tusumti zeye,

“Keyepmti neñ yominañgat ma myuñguñguñinañgat kandatnome mamambap.” *(Zelemia 31:34)*

18 Kogogapm Kawawañaj yom katikpewe beme sâpe sâpe bumbu an ekñenaj sâpe sâpe yom peme mebegat zembuwep ke yañepiñ.

Nin Kawawañ nâmkiniþemti ekmagen sokñan mebanup

19-20 Ewenan sanjgum sesewat mka zegwem zegwem kenan zut kalanme mekotatagat anzam matatan ke Zisasiyan gakime endelege. Kegok mti egan set alaknan sipmanan zulutndeyeyepm nin sesewat mka kenan kambuknan penangat kenan meti kwesin mamambanup. Kogogapm Kilaismagen notnne, Zisas iknanngat sipmanan ningalen yom zulugeyepm nin Kawawanmagen kinngapin ekmagen soknan namtalati mamep-mambanup. ²¹ Apme ningalen sape sape bumbu an nenan Zisas egan Kawawanngalen sesewat mka kenan ke bugan nenan bemti megeyepmti ²² nin ek namkinpeman keyan kenanngalen yom sambe sipmanan zulut kaputme mepme delan manzein. Kogogapm nin yommnanngat namnuknan nen ku mimiyelen yek. Nin namtalatmepmann tu penanan zulutndewiennok kenan penan suk-wep nambanup Kawawanngan nep ndamukulem mbe zemti ekmagen soknan mepmamambanup. ²³ Apme Kawawanngan zetik mti zet manzeinen penananmak etan mambein. Ke namtiyepm namkinpepen ku katikpewanup kalinan atam tabanup. ²⁴ Mti nin notnne indamukulem mimiyet setnaset etan mati kenin melen belan bemti gogot mimindewanup. ²⁵ Apme Kawawanngalen zet nanayelen ondedagen am notnan eknenan kokopin belak wisat mti matalip. Pi Zisas kokogalen kan ilak soknan bein kegogapm nin Kawawanngalen zet nanayet ondekti notnne ekngat kenin melen belan bewanup.

Nin Kawawanngat Nemunan ku bamkumpewanup

26 Yomgat sâpe sâpe bumbuyelen setnaŋ ñen ku tazin. Kogogapm nin zet penaŋ ñotekñaŋ Zisasiyaŋ ningat yomgat gakiye zet ke keŋnaŋgalak bamkumpewanup beme ningalen yom katikpepeyelen setnaŋ ñen kogogak ku tatndawe. 27 Enenogat Zisasiyet gakikiñaŋ ku nâmkinpemann keyet dopmaŋ Kawawaŋaŋ zemdelan zenze muluwen ndesâpm egalen zet zemdelan zenze mulup kanaŋ ke kiŋgagatnaŋmak ma tep taŋam temaŋmak manzin keyaŋ am Kawawaŋgat kasa mamip ekñaŋ ke indazime mupmamaŋ etaŋ bewep. 28 Nin pigok nânup an ñenaŋ Mosesiyelen zii zet ke aŋgosome an zut ma tuk ekñaŋaŋ ekti mimyuŋguguñaŋ ke zemkawaŋ bewep beme ekñaŋaŋ an keyet kemberŋ ku mbep ek kume gakiwe. 29 Âpme naman kogogak. An ñen ek Kawawaŋgat Nemuñaŋ zemtalatpemti mtopewe ma tâtâ alakñaŋgalen sip zulutme keyaŋ keñaŋ mme kwetetepmaŋ beye keyet nâme pepesut bewe beme dopmaŋ bekanan penaŋ tiwe ma keŋ taoletgalen Emetak Teŋ am mme keŋ taolet palen mamaip zemtalatpewe beme am ekñaŋ ke nukñaŋ omba penaŋ tiwep. 30 Nin zet kapigok zeye ke nin nânup,

“Yom dopmaŋ mutumindanda mulup ke nen mbap.” *(Zii Zet 32:35)*

Ma ñen ewe pigok zenzeñaŋ tazin,

“Amobotnaŋ ek amñene ekñaŋgalen zet zemdelan zemindamâbe.” *(Zii Zet 32:36)*

31 Kawawaŋ mama toñaŋ egalen belen am

yommak yomgat dopman mutumindawe ke kwitnan kinngatnjamak penan.

Nin nâmkijpepen katiknan bemti tabanup

³² In alagalak nâmkijpepen yanbemti tabien keyet otnâit. Kan keyet in Kawawanjan Emetak Ten indame egan busatnan indame timtati amnan sisipenpen mindamti sek sindem indame in timti keyet kenan in windenan bemti tabien.

³³ Kan notnangat eknenan animbi sambe ekngat zikalinan indati mozem indome tabien mti zet mgasik gasik penan pi mandiindoip mti nuknan sambe dukninan bemindewien. Kan notnangat in am noline kwitnan kwitnan kebon sokbeme indikti indamukulem mimindewien.

³⁴ In nolin notnan mka katiknan towepme ekngapmti kembern teman mbien. Ma milom bilombi omenzan time in kenin olojen palen tati indikme belak tiwien. In kwitnan kwitnan kululun tatatnan katiknan bam tiwep ke nâmtiyepm kegok mbien. ³⁵ Keyepmti pi eknenan kegok mindame windenin ku kwalebe. Windenan bem maneti bam penanan teman penan tiwep. ³⁶ Mti in windenin bemti Kawawanjan kwitnan kwitnan in mimiyet manâmtiknan min ke mbep beme keyet katnan mamti kwitnan kwitnan zetik mimindendenan keyet penanan tiwep. ³⁷ Keyepmti kan belaknik bugan tazin ke delan zeme Kawawanjalan zelan penananmak bewe,

“Amobotnanan kosât zeye ke ku katikpewe; egan sakwep kobe. ³⁸ Nen am manâmkijpenep eknen nâmkijpepenin nenmagen tazin ke

ekti kwilin, 'An ten,' makuyap ma eknen nâmkînpemeen sukñaŋ bewep beme neŋ ekŋengat nâmindema dolakñaŋ penaŋ ku bewe." *(Habakuk 2:3-4)*

³⁹ Nin nâmkînpemeen sukñaŋ bewanup beme walelet keyet keñaŋ mebegalen. Keyaŋgut nin am keboŋ yek. Nin am nâmkînpemmak bewenngapmti Kawawañaŋ mama kanzizit ndandayelen maŋge tatnup.

11

Nâmkînpemepen katikñaŋ bemti mamayelen yañaŋ

¹ Bamgat kwitnaŋ kwitnaŋ titiyet buŋam zapatnaŋ diindondonaŋ keyet webemti damuŋ mama ma kwitnaŋ kwitnaŋ zikalaŋ eekpiŋ belak keñaŋ etaŋ nâmkaliŋ bemti mama keyaŋ nâmkînpemepen bein. ² Kawawaŋgalen am eweñaŋ baen mamkwabien ekŋengalen nâmkînpemepen sepemaŋ keboŋ mti mame Kawawañaŋ keyet nâmindeme dolakñaŋ beye.

³ Kululuŋ ma msat kapi Kawawañaŋ zeme sokbeye. Zet ke nâmkînpemepen mamti yañaŋ manâmâtâtnup. Kwitnaŋ kwitnaŋ tapme eknup kapi Kawawañaŋ kwitnaŋ kwitnaŋ ku weweñaŋgatnaŋ mme sokbeye.

Abelmak Inok ma Noa ekŋengalen nâmkînpemepen

⁴ Abel ek nâmkînpemepen maŋge keyepm Kawawaŋgat sâpe sâpe bumsame Kawawañaŋ ekme ŋep beme datnaŋ Kein egalen ektakalimpeye. Abel nâmkînpemepenngapmti

Kawawaŋaŋ an teŋ zemti sâpe sâpeŋaŋ kogogak nâme dolakŋaŋ beye. Abelaŋ gakiye yangut egalen nâmkiŋpepeŋaŋaŋ nin ekti mâbâgat sepem matazin.

⁵ Inok ek nâmkiŋpepemak maŋge keyepmti Kawawaŋ ek ku gakikiyet nâmpemti sekŋaŋ melesiŋ wati mowege. Kawawaŋaŋ kekok mme am ekŋenaŋ egat timabien. Ewe kululuŋen mobopiŋ tapme Kawawaŋaŋ egat nâmkiŋpepeŋaŋgat nâme dolakŋaŋ penaŋ beye.

⁶ Nin nâmkiŋpepepiŋ maman Kawawaŋaŋ ningat nâme dolakŋaŋ ku bewe. Nin Kawawaŋ mamain ke penaŋ nâmkiŋpewanup mme am ek aiksâgât windenaŋben matimalip ekŋen egaŋ tosa dolakŋaŋaŋ maindain.

⁷ Noa ek nâmkiŋpepemak maŋge keyepmti Kawawaŋaŋ kwitnaŋ kwitnaŋ bam sokbewe keyet golaŋaŋ zemsokbemsame nâŋge. Dundume ek pedondom samti sip kwep ekŋen alik mamayet nâmti waŋga walage. Kegok mge keyaŋ msat katanalen am bekaŋaŋ mimi toŋaŋ kekok msokbeye. Noa nâmkiŋpepeŋaŋgapmti Kawawaŋaŋ, “An teŋ,” kwitnaŋ kekok kuye.

Abalaamgalen nâmkiŋpepeŋaŋgat yaŋaŋ

⁸ Abalaam ek nâmkiŋpepemak maŋge keyepmti Kawawaŋaŋ msatnaŋ yaŋaŋ pemti msat ŋen met titiyet zempeme egaŋ zetnaŋ gawepuye. Mti msat deset sasayet zeye ke egaŋ nânâpiŋ belak etaŋ zetnaŋ gawepumti mege. ⁹ Nâmkiŋpepemak maŋge keyepmti msat zetik mpeye ke mege. Ke lueŋ maneti mesâtnok mka zegwem zegwem walati ke mawemtan. Aisakmak Zekop eget msat

keyet Kawawaŋaŋ zetik mimidendenŋapmti sepem kegogak mbun. ¹⁰ Abalaam ek mka tatat katikŋaŋ kululuŋen Kawawaŋaŋ timbilanŋe mpemti walatpeye ke sasayet nânânŋ mamantan.

¹¹ Sela ek nâmkĩŋpepemak mamti imbi ilip penaŋ ke beye yaŋgut Kawawaŋaŋ menok mme egaŋ nemba kambakmak tage. Sela egaŋ kapigok nânŋe, “Kawawaŋaŋ zetik mam ke penaŋaŋmak etaŋ masokbein yaŋ nemba sokbembeyet buŋam zapat zeye ke penaŋaŋ sokbewe.” ¹² Keyepmti an kwewetaŋ ke am ambet munzunzungalen windenŋaŋ delaŋ zeye yaŋgut ekmagengatnaŋ nemba sokbem sambelenbien kululuŋen wenzim ma nembuyelen gambibik tazin amnaŋ ku maiŋgalen nemboŋ am keyet sepem sokbewien.

¹³ Am ekŋen keyaŋ nâmkĩŋpepemak mamti gakimâpme delaŋ zeye. Kwitnaŋ kwitnaŋ zetik mimidendenŋaŋ ke belak beŋaŋ daenen tapme ekbienanŋut ku timti ewe belak etaŋ oloŋen palen nâmkĩŋpepemak mamtemien. Kogok mti yaŋaŋin pigok ekbien, “Nin msat kapi belak lueŋ ma am mukup mamanup.” ¹⁴ Am zet keboŋ manzeip ekŋenaŋ msat mamaip ke pemti met msalin penaŋ ŋen aiikgalen manâip. ¹⁵ Mti ilinaŋgalen mka msalin pemti kobien keyet ku nâmbien. Keyet nâmbiek ze gilik zemti mesât nâmbiegen ŋep mebiek. ¹⁶ Kogok mmamti ekŋenaŋ mka tatat katikŋaŋ ke met titiyet keŋin temaŋ tage. Kululuŋen tazin keyet nâpeŋ mambien. Keyepm Kawawaŋ ek ekŋengalen Kawawaŋ kegok zewanek keyet nâme bekaŋaŋ ku benak. Enenogat egaŋ ekŋengat mka temaŋ ŋen aikindawe.

17 Abalaam ek nâmkijpepemak mame Kawawaŋaŋ yaŋaŋ mekme egaŋ Aisak sâpe sâpe bumbuyet sisak palen mobempeme tage. Egaŋ zetik keyet penaŋ Aisak nâŋge yaŋgut nemuŋaŋ kwewetaŋ ke Kawawaŋgat sasâgât mge. ¹⁸ Kawawaŋaŋ zetik pigok msaye, “Aisak ekmagen iŋsokdine sambe penaŋ sokbem sambelenjep.” *(Sokbembe 21:12)*

19 Abalaamaŋ ke kapigok nâmti mge, “Kawawaŋ ek am gakikiŋaŋ mme wawatgalen windenaŋ tazin keyepmti gakinak ze naman Kawawaŋaŋ gilik zemtî gakikiengatnaŋ ŋep mme watnak.” Njen kapigok mene zewanek, nemuŋaŋ sâpe sâpe mundumengatnaŋ watoge ke gakikiŋaŋgatnaŋ mwage sepem beye.

²⁰ Aisak ek nâmkijpepemak maŋge keyepmti egaŋ Isâ ma Zekop zemgwatnaŋ zet mimidamti kwitnaŋ kwitnaŋ bam sokbemidawe keyet zapaŋaŋ diidoŋe.

²¹ Zekop ek nâmkijpepemak maŋge keyepmti gakikiyelen kanaŋ bududuk beme Zosepgat nem-ulatnene zemgwatnaŋ zet mimitdamti tonje palen tati Kawawaŋ pedondom saye.

²² Zosep ek nâmkijpepemak maŋge keyepmti gakiki kanaŋ sokŋaŋ beme nâmti Israeŋ am ekŋenaŋ Izip msat pemti mebeggat zapaŋaŋ diindomti naman mesâtati kasetnaŋ mti mebegat eweŋanek zemâtâtindaye.

Mosesiyet nâmkijpepeŋaŋgat yaŋaŋ

²³ Mosesiyet mamaŋ bipmaŋ egelaŋ nâmkijpepemak mambun keyepmti nemba sokbeme egelaŋ nemba ke nemba notnaŋ

ekñen nembon yek keyepmti egomti Izip ekñengalen amobotnañgalen zemkaliñ bembe keyet kiñgagapiñ eyonça tuk pi enzilimpemalu matatan.

²⁴ Moses ek nâmkiniñpepemak manje keyepmti egañ sememti mame am ekñenañ Palao egat nembanañgat nemunañ zenzeyet egañ keyet nâme wisatnañmak beye. ²⁵ Egañ Kawawañgalen am ekñenmak kot tusumti nukñañ pupuyelen nâmti ekñenmak tusuye. Egañ mama mimi bekanañgalen tikñañ seleset mâti kan belaknik bugan oloñen mimiyet nâme ñep ku beye. ²⁶ An Kilaisiyañ nukñañgatnañ indatitiyet zetik mge keyañ sindem tiwenok Mosesiyañ timti Izip msatgatnañ mânep milawatgat tikñañ ku nâye. Enenogat egañ maneti bam tosañañ kululuñen tiwe keyet nâme mopme manje. ²⁷ Mosesiyañ nâmkiniñpepemak manje keyepmti Palaoyelen ñenzinziñ keyet nâme betatnañ beme Izip msat katikpeye. Egañ Kawawañ amnañ zikalinañ ku eekgalen ke egañ ekti mimiñañnok ekmagen wetekumti tage. ²⁸ Moses ek nâmkiniñpepemak manje keyepmti Anjalalañ Kendo tage. Egañ zeme Israeal am ekñenañ sipsip kumti sipmañañ sekekegen zuluñpemepme ensel egañ kasa tim kwati am indome gakikiyelen keyañ sip ke ekti nemunañe yu ekñen ku indome gakiwien.

Am eweñan nâmkiniñpepemak mambien ekñengat zapalin

²⁹ Âpme Israeal am ekñenañ nâmkiniñpepemak mambien keyepmti Kawawañañ zeme Nembu Namañañ epeemti metat kotat mme msalen imti

tu nembet daeneset mowepbien. Âpme Izip am ekņengalen kasa kuku an ekņenaņ keyegak indamâti mowetne zemti metnepeme nembuyan munduman toti indaminziliye.

³⁰ Israeļ am ekņen nâmkiņpepemak mambien keyepmti Zeliko mka kimbat temaņ bembuluņ tati tokwapme kasup mulup mimi 7 kekok mepme kimbat nanzaņaņ bembenaņ ke epeem topmâge.

³¹ Imbi set kileņ mama kwitnaņ Leap ek nâmkiņpepemak maņge keyepmti an zut msat wiliņgiwun eget indikdamuņ mimideye. Âpme am zet kululu Israeļ ekņenaņ indowien kan keyet ek aņgalaņpewien.

³² Yaņgut zet zapat notnaņ Gidion

ma Belek

ma Semsân

ma Zapet

ma Dewit

ma Samuel

ma golaņ zet zenze an ekņenaņ mimiņaņ ke zewagen kan teepmaņ penaņ benak. ³³ Am notnaņ nâmkiņpepemak mambien keyepmti am maņge temaņ timtot indewien ma am notnaņ mama mimi teņgat mulupmaņ mbien. Ma am notnaņ Kawawaņaņ kwitnaņ kwitnaņ ņen indasât zetik mge. Ma am notnaņ laiongat dembusekņaņ bekekbien. ³⁴ Am notnaņ tep temaņ tazime mme bep zeye ma am notnaņ kasaņeyelen gembo kukņaņ witikme mege. Ma am notnaņ windenįpiņ winde indame windenįbenį tabien. Ma am notnaņ kasa kukuyen windenįbenį tati kasa kuwien. Am

notnaŋaŋ amobotnaŋ ŋeniyelen kasa kuku an ekŋen winderŋaŋ bemti indamâpme mebien. ³⁵ Imbi notnaŋ ekŋengalen nemba gakiwien mme alik bemti wabien. Am notnaŋ kasa ekŋenaŋ indatimti mka katikŋaŋ indemti sekŋin omba penaŋ indom walepme gakikiyelenok penaŋ tabien. Ekŋenaŋ Kawawaŋ bamkumpewien ze kasa ekŋenaŋ ŋep indemti mebiek. Yangut ekŋenaŋ kasa ekŋengalen zet kumti ekŋenaŋ gakikiengatnan wati mama dolakŋaŋ titi keyet nâmti katikŋaŋ bemtabien. ³⁶ Am notnaŋ ekŋen kasa ekŋenaŋ indatimti kwelalin kumti sindiwaŋ indawitikbien. Ma am notnaŋ selin belin tek katikŋaŋaŋ zam indemti mka katikŋaŋ indeme nukŋaŋ pumti tabien. ³⁷ Am notnaŋ ekŋen nanzaŋaŋ indome gakiwien. Am notnaŋ ekŋen sâyaŋ indauluŋme butnaŋ butnaŋ towembien. Am notnaŋ wanam kukŋaŋaŋ indaŋme gakiwien. Am notnaŋ ekŋen kuŋzuŋpeŋ mamti sipsip ma memeyet sekŋinaŋ saŋgumnok ambulut mamtemien. Am notnaŋ sekgalen bandimgat olat olat temaŋ mbien. Âpme am notnaŋ sisipeŋpeŋ mimindawien ma am notnaŋ muluwaŋ bekanaŋ penaŋ mimindawien. ³⁸ Kegok mme notnaŋaŋ msat ampiŋaŋ mepmambien ma notnaŋaŋ kalaŋ dukŋaŋ motabien ma notnaŋaŋ nanzaŋ enzuŋaŋ wemwat mti mamamtemien. Am msat kapiyelen indikme ekŋen bekanaŋ mimi toŋaŋ bewienangut bekanaŋ toŋaŋ penaŋ am msat kapiyelen.

³⁹ Animbi ekŋen ke nâmkŋipepemak mambien

keyepmti ekñen Kawawaŋgat zikatnan mama mimiñin dolakñañ penañ beye. Yaŋgut Kawawaŋgañ ekñen kwitnañ kwitnañ titiyet zetik mimindaye ke ku tiwien. ⁴⁰ Enenogat Kawawaŋgañ ekñen teñ kwakwagat eweñañ baen zetik mge ke ekñengat etañ yek. Nin eyo teñ kwakwagat nâmti zetik mge.

12

¹ Animbi nâmkijpepeñinmak sambe eweñañ mamkwabien ekñen nukñañ omba timti gakiwien kululuñen mobienañ ekñen keyañ nâmkijpem mamayelen set bem ndawien. Ekñen keyelen nâmkijpepeyeen mama ke nin ekti mâbâgat set katnañ bempewien. Keyepmti nin nukñañ sambe ma yom ningat palen mamilik tazin ke katikpewanup. Mti zet zikat ndandañanen ke tati wisat mimipiñ Kawawaŋgañ piliñ bemndeyen ke winde bemti mebanup. ² Mti Zisas nâmkijpepeyet ñeñañ bembe an ma nâmkijpepe keyet penañañ aiksâgât ek ektitimti mambep. Ek keñ oloñen temañ Kawawaŋgañ bam sasayet zenzeñañ keyet nâmti keyepmti tewen moti sindem temañ tiye ma amnañ sakambuk omba penañ sawien ke nâmisimti mmeti Kawawaŋgalen mundumen moti egat betnañ penaset totageyañ tazin. ³ Eweñañ am bekañañ mimi ekñenañ Zisasiyet kasa ñenzinziñ omba penañ mbien. Yaŋgut egañ ke kume topme nâmtalati windenñben tage. In ek msawien ke ekti sebelin sukñañ ku bewe ma keñin keyet teñañ ku bewe.

Kawawan Biengalen musuwewetnanj pembedanaj

⁴In nâmkinjpepeninanjat yanjan meegat sindem indame nâme sindem omba penanj tazewanjut inmagengatnanj nenanj ewe ku gakiye Zisasiyan ningalen yomgat windenjan mtopepeyet gakiye ke nembonj. ⁵⁻⁶Ingat Kawawanjan, “Nemunambanne,” zeye zet ke in kenjanan mkatiknanj bembeyet nâmti zein ke kandabien ma zigok?

“Nemun nambanne, Amobotnanj eganj am nen gogot mpesâgât nâmti ekmagen musuwewet mulup omba penanj mamindein ma eganj nemunambanane penanj eknen kegogak maindamusuwetindein keyepm Amobotnanjanj gamusuwetgeme genj nâmane tototnanj ku bewe. Eganj genj gamusuwet gesât nuknanj nen game genj keyet nâmane bekananj ku bewe.”
(Totatgalen Set 3:11-12)

⁷Nemba biwin dolaknanjanj nemunambanane mamusuwetindeip keyet katanj Amobotnanjanj indamusuwesât mme in ke ekti windenjin ku kwalebe. Kawawanjanj indikme nemunambanane beme sepem kegok ke mamimindain. ⁸Nemba biwin dolaknanjanj nemunambanane mamusuwetindein. In ku indamusuwetindendenjanj beme in nemunambanane penanj yek, belak kambu indabebetnanj kegok bein. ⁹Ma nen ewe pigok zema nâit, bipmne msalengatnanj eknen kapiyanj indamusuwepme in eknjengat kandanjanan meti zelin manjawepuip. Keyet katanj an indapmge Kawawanj Bien mama kanzizit tonjanjanj

indamusuwepme nin egat kandaŋan meti zetnaŋ gawepunup. Enenogat egaŋ mama kanzizit keyet penaŋan ndawe. ¹⁰ Bipmne ekŋenaŋ nânânin tage bukeyet kataŋ kan belaknik bugan ke ndamusuwet ndemkwabien. Âpme Kawawaŋan gulak ninmagen kwitnaŋ kwitnaŋ pembedaŋ sokbemndasâpmme mandamusuwezin ke ikŋaŋ nembon teŋ bembeyet nâmti mandamusuwezin. ¹¹ Musuwetndeme nâman sindemaŋmak mambein. Yanŋut sindem keyet keŋaset Kawawaŋan nânâ dolakŋan ndame keŋ sewakŋan maaiknup ma egaŋ nin mama mimi teŋ mimiyelen manâinen ke mamnup.

¹² Keyepmti in nâmkŋepepeŋinan nukŋan sambe in taaikme keyaŋ sebelin mme ma sukŋan bein kegogapmti Kawawaŋ dundum same egaŋ winde indame dopmaŋ bandim dopmaŋ bandim mti windenŋinbeŋ tabep. ¹³ In wati mama mimiŋin teŋ mama seleset mâti im mepme nâmkŋepepeen noline ekŋen nâmkŋepepeen kaliŋan ku matalip keyaŋ indikti Kawawaŋalen mama mimi mâti mbep. ¹⁴ In am sambemak keŋ sawakŋan palen mamayet mulup windenŋanbeŋ mbep. Ma keŋin kweteteŋmaŋ bemti mamayet mulupmaŋ mbep. An ŋen keŋan kweteteŋmaŋ ku tabe beme egaŋ Amobotnaŋmak ku mambe. ¹⁵ Inmagatnaŋ ŋen Kawawaŋalen keŋ taoletnaŋ ŋen witikme mebeyet dopmaŋ damuŋ dopmaŋ damuŋ mbep. Mti ŋenzinŋat kindiŋan zewet niŋgesatnok peme petnaŋ epeem kwati in sambe indabumti keŋin mme yunŋu temebemagangat eksemti mambe. ¹⁶ Mneti inmagatnaŋ notnaŋan

set kileŋ mambepgat eksewep. Ma an ŋenan Kawawaŋ bamkumpewemagengat Isâ egaŋ eweŋan mge kekok ku mbep. Egaŋ meu isikŋaŋ bugan keyepmti egaŋ ayuyelen betzin biwinaŋ indandayelen beke ketalasiye. ¹⁷ Âpme in keyet nâip ek bam betzin sasayet zetik mimiŋaŋ ke ku sasaŋaŋ. Isâyaŋ bipmaŋaŋ betzin sasayet omba penaŋ sumsame keyaŋ bipmaŋgat keŋaŋ ku mgilik zeye, yek penaŋ. Belak etaŋ sum olage.

Kawawaŋgalen kalaŋ alakŋaŋ iŋkaŋ tazinen ke mobien

¹⁸ In Zuda am ekŋenaŋ kalaŋ ŋen belan ŋep ku timepmegalen keyet keŋan ku patan zewien yek. Ma kalaŋ tep temaŋ manzin ma tambusosok kiŋkiŋaŋ manzamtazin ma tâgâ windeŋaŋben makun keyet keŋan ewe ku mebien. ¹⁹ Ma lumun kwisak ma zet bimŋande gâlâŋaŋ temaŋ ke ewe ku nâmbien. Am kwitnaŋ kwitnaŋ eknâmbien ekŋenaŋ Kawawaŋgalen bim ŋande ke ewe ke nânâyet Moses sumsawien. ²⁰ Zet kapigok zenzenaŋ keyepmti ekŋenaŋ nâme kiŋgagatnaŋmak beye,

“Am ma soŋgom mene ŋenaŋ kalaŋ ke timakbe beme ek nanzaŋaŋ timti kume gakiwe.”

(Kisim Bek 19:12-13)

²¹ Ekŋenaŋ kwitnaŋ kwitnaŋ sokbeme ekbien keyet weŋin mebetnaŋ mamtemien. Âpme Mosesiyaŋ kwitnaŋ kwitnaŋ ekmâge keyet pigok zeye,

“Neŋ kiŋgati sebelan diŋdiŋ penaŋ miya.” *(Zii Zet 9:19)*

²² In kalan kebon keyet ku mobien. In Saion kalan Kawawaŋ mama toŋaŋ egalen Zelusalem mka teman kululuŋen tazin ke patan zewien. Ensel sambe sopmaŋ penaŋ ondektati oloŋen mti tapme in tunŋuwinan patan zewien. ²³ In Kawawaŋgalen nembraŋane penaŋ eknengalen ondedagen patan zewien. Inŋat kwilin Kawawaŋaŋ mamayelen muluwaŋ kumpeyeyaŋ kululuŋen gwaen tazin. Ma Kawawaŋ am sambe ningat zemdelan zenze an teŋ ekmagen patan zewien. Mti am sambe nâmkînpepenmak Kawawaŋaŋ mme teŋ bemti mamgakiwien ekŋenmak tusuwien. ²⁴ Âpme Zisasiyaŋ tâtâ alakŋaŋgalen ŋeŋaŋ bembe an beye eweŋan egaŋ tâtâ ke mkatik bembeyet sipmaŋ mulage. Abeliyet sipmaŋaŋ yomgat dopmaŋ mututuyet kwizet makuin yaŋgut Zisasiyet sipmaŋaŋ am aŋgalaŋindemti keŋ sewakŋaŋ mimindandayet kwizet makuin ekmagen kopatan zewien.

Nin weyaŋ eksemti mambanup

²⁵ Eweŋan Mosesiyaŋ Israeŋ am golaŋ zet di-indome zetnaŋ ku gawepumti bamkumpewien. Kegok mme Kawawaŋaŋ yomin ke ekti dopmaŋ bekaŋaŋ penaŋ mutumindame ekŋenaŋ Kawawaŋgalen ŋenzinziŋ kemagen enzililiyet setnaŋ ŋen ku tage. Âpme alak pi Kawawaŋaŋ kululuŋen mamti golaŋ zet tadiindome egalen zet ke gawepupupiŋ bamkumpenup beme keyet dopmaŋ penaŋ sukwep bekaŋaŋ penaŋ mutumndawe. Egaleŋ ŋenzinziŋaŋ nin ŋep ku enzililiyelen kogogapm eksemti mambanup. ²⁶ Eweŋan penaŋ Kawawaŋaŋ zet zeme Sainai kalan titok

teman penan mge. Mme Kawawangalen Zet Itnananen zetik nen kapigok mgeyan tazin,

“Nen msat etan ku butesowap; nen kululun ma msat ilisakwep omba penan idabutema titoknjit teman msâbulup.” *(Hagai 2:6)*

²⁷ Kwitnan kwitnan butesât zeye ke yanjan kapigok, kwitnan kwitnan Kawawangalan zelan zeme sokbeye ke mbuteme yek bewe. Mti naman kwitnan kwitnan alaknan zeme wembe ke mama kanzizit tati titoknjinpin penan wembe.

²⁸ Kwitnan kwitnan titoknjepin mama kanzizit tabe ke Kawawangalen zemâtâtât katnanen mama ke nin met tonan bemti mambanup. Keyet Kawawangal zemesewatpempti mambanup ma egat nâmann mopme nin mtot mamti iknan mama mimi nâme tiknan mambein ke mti sisilinj msanti mambanup. ²⁹ Enenogat Kawawangal ek tanam teman kwitnan kwitnan bekanan zime mupmapman mambemtozin ke tonan ek.

13

Nin notnne ekngat kember mimindewanup

¹ In am nâmkinjpepeninmak keyepmti in kan katan Kilaismagen nolinemak gogot mamambep.

² Am mukuwan mkanjan kopme in indikti wisat ku mimindawep. Am notnan ekjenan wa am timbumulunup zemti ensel timbumulunjien. ³ In

noline mka katiknan talip ekngat nâmindeme in ekjenmak mka katiknan talip kegok bewe. Am notnan sek sindem timti nuknan palen talip in indikti nuknan ke in timti tapmaipnok bewe.

4 Kawawaŋaŋ am awembiŋ mamaŋin myuŋgumti set kilen maip ma am awembiŋ mamaŋin kambu setnaset mamaip ekŋen ke Kawawaŋaŋ dopmaŋ bekaŋaŋ mutumindawe keyepm in sambemagen awembiŋ mama ke damuŋaŋ dolakŋaŋ penaŋ mbep. Awembiŋ mama ke mame Kawawaŋgat zikatnan kwetetepmaŋ penaŋ bewe. 5 Amobotnaŋaŋ pigok zeye,

“Neŋ ku katikgewap. Ma giktiŋgut ku gigikŋaŋ sepem ku mambap” *(Zii Zet 31:6)*

keyepm milawatmak mamayet keŋin temaŋ ku bewe. Kwitnaŋ kwitnaŋ taindain kataŋ ke tim mamti naman ewe omba penaŋ titiyet ku nâmbep. 6 Kogogapm nin winden tim tati pigok zewanup,

“Amobotnaŋ ek an mukulem toŋaŋ keyepmti am ekŋenaŋ kwileki ŋen mnanayet ku kiŋgalap.” *(Sam 118:6-7)*

Nin Kawawaŋgalen mama mimi zikat ndandaŋaŋ ke mâbanup

7 Am ŋeŋaŋ bembenjin ekŋenaŋ Kawawaŋgalen zet diindowien keyet nâpeŋ mamambep. Ekŋen set keyegak mâti mamkwatneti gakimâbien ekŋengalen mama ke mâti nâmkiŋpepemak mambep. 8 Zisas Kilaisiyet yaŋaŋ eweŋan maŋge sepem kogogak alak tapmain yaŋ ewe mameti mambe katikŋaŋ.

9 Am notnaŋaŋ Kawawaŋgalen zelaŋ kapigok tazein zemti pigok tazeip, “In meu kapi nbep,” ma “Meu notnaŋ kanda ku niniyelen,” zet dâsuki kekok manzeip. Zet keboŋaŋ am nâmkiŋpepeŋin

ku mambandim min. Kawawanġalen keŋ taolelaŋ etaŋ nâmkînpepe mambandim min keyepmti am notnaŋaŋ zet nâmkînpepe bandim mimiyeleŋ ku tazeme in indik kînġatindewep. ¹⁰ Ningalen tâtâ alakŋaŋġalen sâpe sâpe sisak palen tazin keyaŋ eweŋaŋ sâpe sâpe bumbu an ekŋenaŋ sâpe sâpe sesewat mka zegwem zegwemen mambumtemien ke sebempein. Zisas ek ikŋaŋ ningalen sâpe sâpe nembon. ¹¹ Eweŋaŋ kapigok mamtemien: soŋgom bimaŋ eleŋgeme sipmaŋ topme sipmaŋ sâpe sâpe bumbu an ŋeŋaŋ ekŋenaŋ amġalen yom zulusâġât mka keŋaŋ kambukŋanen keyet keŋaŋ mti mopme penaŋaŋ mti zupman meti tewen mambumtemien. ¹² Âpme Zisas ek kegogak sipmaŋaŋ am mme kwetetepmaŋ bembeyet Zelusalem mka temaŋ pem toti zupman kume gakiye. ¹³ Keyepmti nin Zisasiyeleŋ maŋgeen tusumti eġaŋ sakambuk tiyenok nin kogogak timti tabanup. ¹⁴ Kogogapm nin kapigok nâne: Mka tatat katikŋaŋ msalen kapi ku tatndain. Bam maneti mka tatat katikŋaŋ kululuŋen matapmambe ke sokbesâpmġat keyet keŋaŋ temaŋ bemti mamambanup.

¹⁵ Keyepmti nin Zisasiyet pembenġat Kawawaŋ mene mene sesewatsamti maman keyaŋ eġat sâpe sâpe mobotnaŋ ŋen bewe. Nin dembusekŋaŋ Kawawaŋ kwizet buŋamaŋ zempalakŋaŋ bemti mamambanup. ¹⁶ Ma in animbi ekŋenmagen mama mimi dolakŋaŋ mimiyeleŋ wisat ku mbep ma dopmaŋ mukulem dopmaŋ mukulem mbep. Kawawaŋaŋ sâpe sâpe ke nembon keyet nâme tikŋaŋ mambein.

¹⁷ An n̄eŋaŋine ekŋengalen zet gawepumti kandenjan mtoti mambep. Ekŋenaŋ ingalen n̄amkiŋpepe ma keŋin maekdamuŋ mamiwaŋ maneti bam muluwinanŋat yaŋaŋ Kawawaŋmagen zemkawaŋ bewep. Keyepmti muluwin keŋ oloŋen palen mimiyet in zelin gawepuwep. Kegok mbep beme in ekŋengalen muluwinanŋat nukŋaŋ ku indawep ma naman inmagen kogogak totatat pembenan sokbewe.

¹⁸ In ningat mandundum mambep. Nin n̄amtatnup mama mimi dolakŋaŋ mbenn ke ŋoktikŋnanen n̄amteleŋ zemtati mbenn. Kawawaŋgalen zelen tazin ke m̄ati mamayet man̄amkatikbenup. ¹⁹ In n̄aḡat otn̄amti dundupeŋ tapme neŋ Kawawaŋaŋ namukulem mme inmagen sakwep kobap.

²⁰ Neŋ inmagen kapigok sokbembeyelen n̄amti mandundayap: Kawawaŋ keŋ sewakŋaŋ toŋaŋaŋ ningat Amobotnaŋaŋ Zisas ek gakikiengatnaŋ mme wapme sipsip ekŋengalen damuŋ dolakŋaŋ penaŋ onzempeyeyaŋ tazin. Ke egat sipmaŋaŋ t̄at̄a alakŋaŋ delaŋ zenzeŋepiŋ wemti mawen ke mme penaŋaŋ sokbeye. ²¹ Kogogapm Kawawaŋaŋ winde indamti indamukulem mme in mama mimi egaŋ n̄amtikŋaŋ mamin ke mbep. Mme Zisasiyaŋ ningat keŋnanen Kawawaŋaŋ mama mimi n̄amtikŋaŋ mam keyet mme sokbewe. Kegok mimndame nin keyet Zisas Kilaisiyet kwitnaŋ mwatonzempemti kwesiŋ kwesiŋ masesewatsamambanup. Ke penaŋ.

²² Kilaismagen notnne, neŋ in kapigok mimiyet apitilim indemti keŋin melenj belenj bema tata-

galen zemgwatnaŋ zet kapi diindosâgâti zapat meluwaŋ kapi teepmaŋ penanaŋ ku kuyap yek.

²³ Ningat notn Timoti ilak mka katikŋaŋgatnaŋ peme zupman tolep. Egaŋ kot sokbemnain beme nilizuzut inmagen kopmalu ndigip.

²⁴ Neŋ ingalen an ŋeŋaŋ nâmkŋpepeŋinmak sambe maip indamukumindeyap. Am nâmkŋpepeŋinmak Itali msalen mamaip ekŋenaŋ kogogak indamukumindeip.

²⁵ Kawawaŋgalen keŋ taolelaŋ inmagen wemti wembe.

Kawawangalen Tâtâ Alakŋaŋ
The New Testament in the Nabak Language of Papua
New Guinea
Nupela Testamen long tokples Nabak long Niugini

copyright © 1988 Wycliffe Bible Translators, Inc.

Language: Nabak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

ea68a902-358a-5c72-82de-a583fc4809e7